



勉菴集
六

~ 16
2374
6

共二十三



2874
23-6

勉菴先生文集卷之十一目錄
書



與閔議政 泳奎

答李聖一 道寧 ○ 三

與李 昌穆

答李泰隣 建初

答朴抱川 永世 ○ 四

答鄭觀察 泰鉉

與李亨洛 宅煥

答李啓道 承源 ○ 二

勉菴集 卷十一 目錄

答郭參贊 鍾鏞

答洪尚益 堯

答閔仲一 弁浩

答曹雲見 龍煥

答柳可浩 鍾源

答河致伯 在九

答鄭致範 煥民

答慎而伯 炳淳

與河東校宮諸儒二

答慎子鴻 宗翼

答田順道 相武

答權應天 煥

答權樞卿 斗烈

與河兼洙 智鎬

答金君明 哲相

答鄭敬安 觀源

答慎景儀 宗鳳〇二

答鄭敬之 在洪

答鄭允範 在禹

答金明彦 萬源

答丁燦化 炳和

答梁茂如 松

答李致綱 文敏〇三

答金甫顯 章錫

答安致恒 升煥

答吳景元 永奎

答閔士善 膺鶴〇二

答梁致三 相韓

答文子弘 載恒〇二

答安舜見 國楨〇二

答金文見 奎源

答金大成 永珍

答李國瑞 熙容

答權君七 載斗〇二

答梁大集 在成〇二

答文聖中 載九

答文致慶 載榮

答俞道明 正濟

答閔彦卿 大鎬

答李穉春 種德

答宋正汝 宙勉

答黃道弘 晉模

答尹文七 殷普

答閔龜瑞 洛鎬

答趙景茂 昌駿

與李叅判 南珪

答鄭致學 闇教

答韓文五 擇東

答金敬文 漢穆

答鄭象七 斗教

答柳華應 永吉

答金玉汝 相珪

答吳汝周 昌鎬

答白子行 景寅

答魚升汝 聚善〇二

答朴明仲 永東

答安公三 圭容

答柳春伯 寅奭

答梁清一 在德

答南士珩 廷瑞

答南汝弼 恭

答李行源 宗洙

答文周尚 活惺

答田斗泳 珪 穎 ○ 二

答鄭準明 秉基

答鄭士明 戰 基 ○ 二

答南明重 昌 熙 敬夫 台 熙

答安明元 東炫

答申文淑 泰 禧

答黃景涵 澈 源

答李仁甫 長煥

答鄭子元 尙憲

答金仁淑 秉厚 敬淑 秉 胄

答金夏卿 亨 普 ○ 二

與郭允壽 漢 一

答鄭儒澤 泰 琛

答具汝仁 然 學

答林景三 自 圭

答李禹範 永 錫

答洪德韶 祐 鏞

答鄭貫一 道源

答鄭德潤 昌奎

答鄭寶汝 鍾璣

勉菴先生文集卷之十一目錄

勉菴先生文集卷之十一

書

與閔議政

承奎○丙午閏四月七日

瞻仰德義之日久矣即伏聞光膺大拜朝野忻頌無異夢卜益鉉於平日雖未嘗有一將命之分其所以為民國賀者亦豈後於人哉竊計登 筵有日嘉謨嘉猷當已畢陳無餘矣亂賊何以討罪讎敵何以報怨國權何以恢復人民之將盡死者用何道以救活疆土之將盡奪者用何術以保全凡今國家人民之責之都湊於閣下一身上者其亦重且大矣益鉉老



而不死目見昨年十月二十一日之事非不欲即效
閱趙諸公之爲而明知吾君之不能有所爲則徒
煩諫爭不濟於事自經溝瀆又不過爲匹夫之諫由
是強延殘縷忍至于今幸而有同志若干人誓心殉
國共謀翟義趙重峰之舉今已計劃稍定揚達義旗
所願洗兵東島問罪倭主會同各國大開談辦繳滅
前後劫定之約以復君讐以固國權然材駑徒弱又
有進會倭兵之前後迫逐何可望其有成也只是伸
吾大義使天下知我大韓亦有忘死爲國之人則其
爲異日恢復國權之地不無萬一之助矣但欲上章

陳達愚忱然恐有格不入之慮故不揆體例並前郡
守林炳瓚疏謹茲封上幸於從容進見之日即爲
密呈俾達苦衷更勿如閔忠正遺疏之隱而不納千
萬幸甚

答李聖一 道宰○戊戌九月十日

疇昔傾蓋迄今慰荷即茲料外珍札入眼仍拜審伊
來台候起居神休萬重實叶遠禱下示職命 聖恩
隆重感惶文摯且讀來教委曲懇惻人非木石寧不
欲磨頂放踵思所以上報吾君下酬知己哉然山
野之性迂恇成痼決不敢彈冠結綬以取僞笑且念

國勢民命倒懸至此雖伊管大才尚難下手况全昧
識見一襜褕固陋之人豈有一分有助於時義以此
自劃斷斷難回荷意甚勤不獲奉承還切慙懼死罪
死罪

與李聖一

戊戌九月十七日

伏惟日來台體度神相百福不任仰禱第賤名之更
玷仕籍已是夢外而既不能奉命奔走則又不可
緘默偃蹇重添罪譴茲又以一疏乞遞令兒子替呈
鄉曲鄙暗多不識例未知其能入達否也盖今時事
可為痛哭者何止一端然其轉運之機惟在乎吾

君之一心是以不敢漫言他事只以此略敷數言以
進但辭不能盡達素意是可愧惶若天恩重大得
免連慢之誅則唯得速處是為私分莫大之幸此則
不無深望於台執未知如何

答李聖一

丙午四月

南服

新命簡自

聖心此乃

宗社神靈默佑於

冥冥有以為轉危為安底機會消息在台座平日憂
愛之摯其所以小心慎密欲報答於萬分地頭者尤
如何於此漢自奉向覆豈不感盛意之所在而勃勃
伎倆忍住無奈輿病棲屑已為數日是豈有別般商

量出人意表狀直以為一時疏鬱之計而已至若主
事建議頭緒節次惟台座是恃復何仰煩伏祝加重
千萬

與李

昌穆○丁酉八月十八日

匏繫窮巷慕用非一日矣邇蒙尊駕貴臨信宿擔懷
感與悚并莫知所喻居然夏已秋矣伏惟哀體保重
秋雨頻仍豐稔未卜清素契活雖曰任分老境願養
自不無戛戛難裁之歎為之貢慮尊先文字家侄洛
行曾違兩料未克趁付雖知恕存不至厚責而失信
則大矣悚仄何言蓋前後二作坐於筆意拙澁專不

成樣而猶且冒沒露呈者實出於珍重俯教之無階
防塞而然非敢調體制圓滿可傳愈久而取必入用
也鄙意須更從當時大方家有德望者商量就正似
為萬全之計未知如何益這間雖無大段疾病而脚
氣種種發作殆難支吾良覺悶憐萬一因封如期
得遂哭班之行則當圖歷拜不備

答李泰鄰

連初○戊戌

丙申族邸之奉昨歲路次之接意長話短迄庸頽頽
茲蒙不遑辱以德音拜擊三復奚啻百朋南史正綱
整頓至此實斯文千古之幸也凡有彞性庶幾其喚

醒耳目奉助下風而畿輔物情有難如意良可恨也
俯教弁文愚本空疎百事缺陷中史學尤甚不堪議
至於大方家規模間架之萬一則固不可率爾承命
使之累及於先輩長德且以其稱則大夫之後也當
主辱臣死之日草間苟活有覲舉顏非只自家之心
獨然乃一世公議之所同尤不可看作等閑文字而
妄託名字取傍觀之竊笑者審矣情勢如此庶有俯
諒

答科掇川

錄世○乙未十一月二十五日

公堂賜款既云榮幸荐承臨賁多少誨諭光明磊落

始知剝頭毀冕之日唯閣下有古士君子氣節自不
覺歛衽起敬苟能推是以往益加勉勵砥柱乎頽破
日星乎昏衢雖萬夫沮撓不動一髮則抱之全幅猶
足為一脉陽氣之所寓豈不誠萬萬大幸矣乎自是
以來發眠稍甘腦中勃勃亦且少定計以為即晉拜
謝不意續承下狀奉讀以還擬倫獎借萬不稱停不
惟益鉉之情迹一倍難安亦恐傍人有以窺閣下之
淺深也萬望掃除浮文一從古道勿使此漢顏發駢
幸甚俯詢諸條固知存養所發自當遊刃恢恢何待
倚助且夫此等事決非村氓野當干涉下諒如何餽

物初不欲冒受而是惟閣下之賜故又不敢不受耳

答朴抱川

乙未十二月二十五日

伏承下狀審體節萬衛極慰下忱益鉉塊坐數旬氣鬱不降膝痛轉甚不可支吾自憐而已胎示謹悉而只緣民等之頑固有此下上之勞攘悚仄悚又至若辭官之教尤不勝矍然迨此多難之日將置一邑民人於何地而有此過當之計耶幸即還官千萬伏祝

答朴抱川

丙申七月六日

自論伊阻動經數朔其間多少事合有一番罄竭以替面稟而棲屑月餘未展所懷還切泛然夫興學大

政也肉食者之所未能其以十室薄廩儲經峙糧振起頽風此實有邑數百年未有之大業此一事也閣下下車未幾日矣行政非小惠也自近至遠竊聽於大同民情則莫不曰我侯廟堂之才經濟之學惜其不得展布於密勿帷幄之中而少舒宗社倒懸之急也廉范治績尚矣勿言梁楚間聲何以得之此二事也以益鉉之向日事言之賦性狷滯坐違朝命揆以事體合置重典而能高枕山裏迄今保全者非只我君相好生之德實是閣下上下聒喻周旋彌縫之力也雖甚愚迷寧不知德此三事也惜乎以若望

寶世鮮知德未展驥步薄試牛刀男兒落地孤矢四方之志豈但如是草草試天也時也奈何奈何惟將此身心奉塵刹是則名爲報佛恩者庶可爲今日準備語也未知如何益鉉八夏以來腸胃受病殮未合眠渴亥子殆沒意况只待符到而已屢蒙親筆未克一一上答悚又極矣

耆舊傳蒙此下惠勝朝事之七十年墻壁庶可辭蒙何幸向借二件中道學正脉謹爲移謄經世大訓規以大全語類雖未十之一第其編摩分類部居井井臨事考據尤極簡易政是不易得之書也老境看字

隨見輒忘雖不得力有時開卷未爲無益而第其語錄去處不能句讀者大半大家書籍想或有語錄該辭自爲一書者及尤齋所著朱子大全劄疑等書得此傍照則庶不至鶻圖吞棗而窮鄉蟄伏無路借見伏望畱念敢恃知照猥茲煩瀆

答朴抱川

戊戌九月十日

一自山谷拜送以後不能以一書修候雖緣病懶悵悚日摯料外專倅兼承惠訊謹審菊令體事一例謹旺鮮紱閑居日對經籍城市而山林趣此世惟有執事一人蟄伏窮巷有時神逞恨不能與共几案得聞

緒餘也益鉉斃斃衰喘去松下塵無幾且兒憂跨朔
終不回棹言之殆齒酸耳職命寔出夢外此身之與
世相忘執事之稔知也豈有一分可進之階設或冒
昧而進亦豈有所助於今日哉幸為我謝心台如何
來教喚醒云云亦何敢當然以體面言之亦不當默
默而坐筭容更思計耳

答鄭觀察

泰鉉○乙巳五月十四日

業海殘喘耳坎尚存竊嘗聽於士友徃來之誦不容
口咸曰當今先正脚下朝廷所賴以為望士林所恃
以為重者可一二數而惟鄭承宣令公特立頽流務

實於內則百善周全賦政於外則四方爰發於是又
竊深惟以為士生此世既不能自附於古之賢人又
不能自達於今之君子而諉以老廢孤守此夏蟲井
蛙之識亦恐見笑於大方之家也乃強策病軀自文
獻先生遺愛之鄉俎豆之場以及於執事者考槃永
矢之地雖適值藩任未遂荆識而觀於設施大槩則
滿架詩書有以知心上之經綸居然泉石亦以見高
尚之清風是則前茲未了之願幸矣得償而歸猶充
然長在心曲茲者不意惠音之勤藥料之厚尤足以
澤朽株而光蓬華則悚先於感殆不知所以為謝也

益一入 脩門無所敵爲故遲其行竟爲內外豺狼
輩驅率以至於此始也不量而入者安保其出場之
無事乎仰想執事亦應惻然而太息也自餘書不盡
言

與李亨洛

宅煥 ○ 壬寅十月五日

向於貴省行得與意中諸士友三炎光陰容易消遣
在嶽色水聲之中使七十年鄙吝無一點子留滯
肝膈及其歸臥蓬廬不幾日形已有未便之苦心多
有不豫之端比諸疇昔便作別人學之未講老無得
力者如此古之所以自強不息詎偶然謂哉算念生

事寥落以晦翁之幾於聖域尚或有慨然之歎况於
篤老情境其所憧憧倘如何也北來消息依舊是混
沌家計草茅賤枕只切仰屋故山行役無事抵泊而
年形大歉目下物情頓無安帖底意思未知未稍究
竟之作如何樣子萬一道路無梗華旆西笑則更對
典型或不異事而時象到極難可如意者焉可欠矣

答李啓道

承熙 ○ 戊戌七月七日

俯致一二此政我東數百年未決公案其必有吾先
師工程然後看吾先師得出亦必有尊先府工程然
後看尊先府得出苟不能然而強爲大言以犯不韙

固所未能惟以耳目所覩記言之則先師說心直或
諸程朱定本其深造自得談於講論著之文字者類
皆淋漓霽霽玲瓏活潑絕無依樣套襲之可言故世
儒之安於故常不能通變者未始不大小驚恠公肆
排斥然問其所由則不過以氣字了勘曰心氣也神
明氣也明德氣也蓋理無無氣之理氣無無理之氣
理之所在氣必從焉只分別上下帥役之分而加精
一克復之工已耳何必倒置名位變易朔南而後始
可曰知道也耶至若愚之所處於省翁則稍有別焉
心訓一款斷不可苟同不棄故舊亦自有聖訓凡屬

言議去處只當錄其善而不阿其失黜其謬而不沒
其長而已未宜動加拳踢一切以千萬不近人情之
說公傳流布駭人聽聞者庶不負同門之誼云矣豈
此說或被好事者流傳關於尊聽抑亦深悶其不能
一刀兩段索性攻斥如烘柳二君之為而至有兩可
調和之疑端也歟調停彼此自有其地乃小小議論
上參差之謂耳其在道體之根原學問之頭腦焉容
拖泥和水喚鐵作金而得罪於千古相傳之不刊大
訓也猥荷知照僭易及此幸垂察而還教也

答李啓道

庚子十二月二日

益鉉今四月盡室寓湖西之定山五月遊嶺外至八月始歸所寓其翌朔有書自京遞來忙手披讀乃惠書之出於上歲四月者也雖其中間滯留之久而又喜不遂殷沈况其所以警戒昏惰者足當藥石又垂之以不恥之問感愧交并無以為謝但來書論先師華翁先生及尊先丈處似不甚顧前覆意也夫吾先師平生學問入頭處蓋以為凡天下萬事萬物皆有上下兩面上者為理下者為氣理之為主為帥氣之為客為役實天地古今不易之大經物皆然心為要故其言曰心者人之神明合理氣而包動靜者也又

曰易者合道與器而立名也單指道一邊則曰太極也心者合理與氣而立名也單指理一邊則曰本心也又曰天統地故天專言則道也神統鬼故神專言則理也心主百體故心專言則人太極也又曰心氣也物也特其上面所具者理故自昔聖賢言心蓋多指此是其辨別精微分劈上下既有以極乎不離不雜之妙而又存以嚴乎主客帥役之分既救俗學主氣之失而又皆專襲經傳非獨出獨見之言也特欲使學者識其本體有所準的依歸而已故其發明前言如大體天君道心主宰天地之心仁義之心心為

太極之類常加致意焉然亦於當體中指言其理為主處非如柳椽心即理之說矣然後學之誦言迷指者慮或差殊則又有省齋柳公棟別之論而先師立言大旨尤益光明彰著可以俟百世而無疑矣獨遜志洪君雖其氣魄言論之有過人者而各言之際未免蹉過一步駸駸入於柳椽輩之緒論而自不覺陷師於不韙其舉措可謂妄矣至於尊先丈盛德邃學固已所欽仰講服而孤陋寡聞既未能親受教誨於臯比無恙之日又未能盡讀其書以窺地負海涵之實則其與吾先師學問宗旨同異睽合之分果未能

詳知而遙度也是以前者仰覆大槩以為無吾先師學問者吾先師不出無尊先丈學問者尊先丈不出云云矣今細檢來書之意似以鄙言為二家心法相同之證而遂謂華翁心說與尊先丈無異則是不惟未察鄙言之本意恐在華翁及尊先丈苦心講明之旨亦有所掩蔽而不明非細故也若夫世人之只任臆臆者雖百誣百斥亦何加損於其間哉愚見適然故敢此覲縷幸更詳而回教焉謹詢歲窮經體益茂大度俱膺吉祥千里相望只切馳仰益鉉老來離鄉棲息未定唯幸眷屬無他戍戍鄙疏云云可知其言

有來處而比張禹孔光亦已濫矣然似亦非心公人之言只可任之而已教示堂記雖切託名之榮而非惟不嫻文字更兼病思衰落執筆茫然雖欲為之亦不可得悵歎奈何別紙四條皆大義所係有非管見之所敢臆對而至於尤翁之以清陰桐溪為非中道及以美村無必死義兩端未知見於何書而大異乎尤翁平生之旨矣蓋以清陰桐溪為非中道則必以崔鳴吉所為為中道矣以美村為無必死義則以仙源金權諸賢之死為傷勇矣其害義醜正之論政尤翁所深排者乃反自為是言耶大抵義理無限其精

微之難見者固非人人之所可知如此等者直如青天白日雖婦孺亦皆知之而况在數百年之前其邪正是非已大判者耶幸更三思如何遜志云亾吾黨益孤挽詞當隨遞付之矣

答郭叅贊

鍾錫

丙午三月十八日

頃於李生回恭承手命審返稅後履道起居茂納貞吉時義展縮誨諭丁寧警發多矣顧不佞學之不講雖極荒踈豈專蒙然於天下大勢事面難易而故欲為暴虎馮河之舉哉誠以朝廷養賊三十年尊其道師其人未稍究竟使三千里 太祖故國盡脫其土

皮五百年孔孟禮義一淪於糞壤數千萬生靈方將
奴隸臣妾而若爾冠章甫衣縫掖而列於吾黨之中
者頓無安身立命之地則斷不可曰職兼封疆官非
言責而恬然為自靖計者審矣所以前此妄陳鄙見
而冀承理到之教迺以禍患遑速生民利病諄諄為
諭可仰其愛君憂國出於至誠然亂極思治天理自
在則亦安知不因此一舉而有毫分轉移之機耶且
既張之舞不容退步將欲進止嶺湖之界糾合同志
為畢義顧忠之計知之罪之庶或諒燭且夫世間萬
事一則誠二則雜常物之大情執事雖不堪荷戈執

受從事道路亦以聲氣相助打成一片則天地鬼神
亦不無感應之道而華夷人獸之辨倫理綱常之重
亦將有發明維持之道矣豈容屬之無可奈何而為
荷簣者法門耶猥特知照敢陳肺腑幸須照領手戰
借草不備

答洪尚益

禧○丁酉五月二十六日

山野閒散重得洛陽友書存豈是易事迄今玩繹殆
紙渝而字幾漫矣懶與病謀未克修覆曷勝悚仄伏
惟仲夏尊體動止萬衛天步艱難 因封又退俯仰
兩間此何人斯只切固極而已中外流傳雖云無事

以鄉曲淺見虎尾漏船不足喻其萬一裏面物情果如何云爾益老大無狀自速人言尋常一札遽作別人却顧兢惕不省所措只理義無窮見識參差則誅褒榮辱一聽於公論而已更甚商量以此貌樣朋友往覆亦涉愧汗而於座下不可無覆力疾蚯蚓

答閔仲一

并浩○丙申二月二十八日

益放言危行自速駭機流俗所輕謹肯見恤乃蒙尊慈拔例賜款屬意甚勤又以見所存養之沉潜理窟發為辭令者類通明朴實可以決大疑任至重而處之有餘令人悅服願學未能則向日事誠歲寒一遇

而造次石藜之困未嘗非賤者之福也只蒲柳殘質蹉過少壯老益頹廢不能極意傾倒而為晚境収用者為可恨歸伏田廬無可晤語戀想德懿無日不勤料外兩度珍幅次笄入眼擎展圭履慰敵百朋獻啓投書豈不是至公血誠而世鮮知音未見納用譬如病者垂盡自不肯服萬金良藥奈何奈何時事頓無別聞又不知何樣禍機伏在冥冥只切添憂而已

答曹雲見

龍煥○戊戌六月二十一日

尊先文字率爾犯手汰汰多矣曾懇以曲加刪正俾免顯疵者寔出肺肝而例蒙印可謹短恕拙殆非所

望於執事也令胤志尚遠大甚可畏敬雖其姿稟之
有受而管子所謂父兄之教不肅而成者自不可誣
矣決不待外人勸沮而為盈虛得失所動可賀可賀

答柳可浩

鍾源○乙酉九月二十五日

僕有覲苟活杜門待盡茲蒙君子跋涉千里遇以
古人之義此已望外迺又惠以手命旨意鄭重有若
以此漢為可取者固知仁人君子包荒納污謙光盛
德出尋常萬萬而顧吹噓失實擬倫過重則殆慙然
慙懼莫省措躬之所也尊先文字拜受三復雖年代
久遠文獻短少仰見德門世風淳謹頓無外慕之一

端欽歎何已至若屬辭比意寓諸金石決非賤拙之
所能當者而遠外感教不容終孤且託名為榮依狀
塗乙專沒格樣只切悚仄而已

答河致伯

在九○乙巳二月

古今人同心尚可謂朝暮遇况一面如舊德懿風猷
自不覺歛衽心醉則乃宿緣之有定而賤者之光華
也雖欲忘之其可得乎七佛時惠書合有仰覆而座
擾手拙未暇及焉歸樓數日旋作楸行經歲始還則
便置之忘域居爾為四周年矣茲蒙不較被以珍函
勤怠之別又奚啻三十里也伏悉靜候對時康衛所

值變境令人淚滋其在聽孫之齡逆理疚懷可且勿
言左右服勞賓祭酬應何以管當聖人於不得已處
提出一命字以定天下之志者良有以也幸十分寬
懷勿致損愆千萬千萬益始以間巷之微分中荷洪
造之大 恩當茲綴旒之日而息偃在床亦非常措
道理不量而入竟也顛沛至此學之不講尚誰怨尤
只得杜門待盡耳亭記苟可爲也託名爲榮何敢辭
諸而本無所儲且經患難以來此等閑漫切不欲著
手徒取外人之譏笑則今於盛教之下亦未敢率爾
承當俯諒如何

答鄭致範

煥民○辛丑二月十二日

教先蹟首末略略卒業先輩風韻敢不願學至其掄
揚幽微用信來許決非蹇拙手樣所可闔域而遠承
勤教敢茲杜撰不成頭緒極可汗顏耳今從抱妙歲
英發動靜周旋之間信其為法家拂士益賀德門培
壅之厚也

答慎而伯

炳淳○壬寅九月十二日

每切識荆之願而路左身病未易斷定乃天借其便
幸伸一宵之穩世間事之不可預度者有如是矣迄
茲充然殊難弭忘只令胤當茲芳年宜其慥慥而許

多光陰浪費道路者極矣未妥過庭之暇幸頗加提
醒不至姑息千萬切仰謹詢日來體履起居一例鄭
重庇內諸百並何似僕纔休餘憊將發祿行回還遲
速不可預料不知者必以為七旬老客緣何屑屑而
其枉情地何臨行索書語不盡情

與河東校宮諸儒

辛丑八月二十六日

伏惟秋殷僉尊體事萬旺益鉉敵門旣旣無足奉道
竊惟河東一區山水擅名亦鄙先祖文昌先生杖屨
之鄉也不幸琴川已墟復院無期遺像深藏展誠無
地此不但雲仍之私相歎恨亦豈非士林之所共慨

歎者乎崔君廷鉉志在追遠為建祠安靈之計誠甚
嘉尚而幾十年未遑之典盖有待於今日也然鄙宗
之弱子殘孫在在貧乏無以為力若非老成宿德負
重望於一鄉者為之鼓動振作而協贊大事則尊賢
之禮為先之舉實無以成始成終也幸望僉執事出
謀發慮從長指揮俾數間之廟無半途之廢則吾黨
之光奚啻萬丈愚雖老朽謹當趨賀於左右獲覩揖
讓進退之盛儀也不面之地敢此覲縷豈勝悚仄

答河東校宮諸儒

辛丑十一月六日

橫川祠役聞已開基此固鄙宗若而人誠意所格然

不有諸章甫另念周旋何以營辦大事也耶顧今士氣沮敗不知俎豆揖讓之為何事而一隅仙鄉能保一葉之青尊賢尚德不失秉彜之天是蓋寒蠹晦退諸老先生之風尚有存者而然歟何其感也靡不有初鮮克有終又不可不念瞻仰遐祝只此而已僕衰頹日甚不能致身於董役之列徒煩紙上空言於宗族士友之間老矣無用慙愧何言

答慎子鴻

宗翼○丁酉八月十九日

留京多辨時象物情亦當了然於胸中如有用我者又當何以處之士大夫辭受出處關時運之盛衰風

俗之汙隆云者是我晦翁夫子遺訓而亦尊先黃臯先生平日所講明敗膺者也冷暖去就計應默有定筭非餘人所可贊一而相愛之地贅陳大槩庶或不以為僭汰也

答田順道

相武○庚子十一月八日

續拜惠翰嶺外即門庭拜悉間者棣體動靜依昨寧靖大事竣完庶無餘憾仰庸獻賀前此文字非敢望八用實以勤囑之地泯然無事者殊非義致因安有塗乙而精神幾短有此闕漏極涉悚仄雲菴墓文謹以艾山所述移謄無他發揮者盖不但事蹟之短小

實以筆路拙劣敷衍不得尤切赅汗

答權應天

大煥 癸卯十一月十二日

仲春惠存迄茲感領而容易稽復拖到一年心常結
轡伏惟陽復春府寢膳順序康寧侍養體事亦復如
何數譽之來未必皆實在我不可遽以是為欣感處
人亦不必以此為進退苟能自反而無悔焉則彼自
外云云殊若風過耳雲過空于我何事但講於中者
無實見得是非則便以公為私以私為公者有之幸
益懋涵養以光士林

答權樞卿

斗照 乙巳四月十五日

冉冉光陰奄屬夏令遙想高居百千景象森在眼前
自不勝區區切怛謹詢是辰靜候動止對時增衛大
都并若何前此俯訊伴以藥料其感矣啻萬金而陽
來急發且值風眩不省人事致茲遷延倘或恕量而
心焉不寧如物在喉至於近日則眼眶痛痒係是別
證晝宵作祭禪樣良覺悶憐耳

與河兼洙

楷鑄 庚寅

頃者高明誤聽塗傳跋涉脩程辱枉陋地菜糲談笑
永言數夜自量地步雖曰感幸在高明遠遊博觀以
為資輔之計缺然甚矣且夫三人行損一人二人行

病一人想其寂寥憂慮備喫許多酸困尚庸慨嘆未
弛謹詢稅駕後尊體動靜一衛三餘玩繹在何書淡
造自得非言語頰舌之所可敷陳為之健美記下僅
依宿樣幸與李友論世談經頗不寂寞但護寡本領
無以副好問之意耳歲色隔紙遽爾告別當寒薄著
又未知何以利涉蓋切關心崔君能無事抵達否

答金君明

哲相○甲辰九月五日

秋水蒹葭懷注政勤即茲手命入眼拜審伊來尊體
動止對序衛重大度清勝當此屯蹇只得保全一日
是一日之福也慰寫何可言鄙人糞土餘喘濫叨

召命揆以事面在家未敢才近日下鐵限在前迤向
故山單疏待命為國存與存國亡與亡以死繼之
乞計而巧罹疾病百念都灰不意僉少年觸冒蹄迹
之衝專次顧存可見其意想之不草草鳳毛蘭根前
程甚富恨老病若此不得助下風之萬一耳

答鄭敬安

觀源○甲辰三月三日

是時出門蓋亦難矣料外賢胤左顧珍翰入手恭審
尊體啓處對序衛重大度佳勝慰感交摯鄙人五官
失守健忘尤甚前此俯教置之不論久矣承茲提警
旋切悚怍第念石瀨二字既非先令監所親命扁又

於亭之託義殊不襯貼故擅有云云非欲以文字自居也當茲搶攘臺榭宣鬱猶是等閑事只苟完朝夕開卷發蒙乃小貞之吉塗乙亂草雖不足觀或可爲宅山之一助也歟時事日非多聞其所不聞我生靡樂直先獲語也雖欲溘然亦豈容易者耶日氣稍暖欲前向故土取近京傍爲進退計也而望八客道路棲屑豈其所欲哉只自咄咄而已

答慎景儀

宗鳳○己亥二月十八日

病伏淖淖萬緣都空時念往事惟月出一抹耿耿心目間山川尚然矧在朋友惠好未已者乎即拜珍函

腦次灑然執熱濯清未足爲喻謹審歲改春仲尊候動靜神勞愷悌大度佳勝仰荷曷量向副文字鹵莽淺拙若使具眼者一經涉獵政不滿一哂適足以貽羞先懿方且訟愆反蒙印可殊非所望於執事也令胤課程能接續無間斷否千百萬事無急於讀書一款過庭餘暇頻頻照管無至浪過政朋友之望耳

答慎景儀

辛丑八月

文谷集荷此勤念寄矣餘力念執事體粥難給之地可能容易者乎反覆思量還切難安耳令胤料外見存其慰何如而昏耄轉甚無以助發其火燃泉達之

勢者甚可忤怵而要之決意而往須用已力不在外
人之勸沮須因過庭頻加提撕乃亦以身之要法也
未知如何

答鄭敬之

在洪○庚寅

病伏窮廬聞是猶喜不料先施之間闖入手中披閱
三復可得其心固不以曾無雅分而有所泛者至以
內無專一之工外無賢師之助為憂則尤以見秉心
篤實猶恐不及之盛意出餘人一等深庸歎歎但愧
愚陋十分荒疎無以副好問底本領董生兒寬有前
人已例聖賢遺訓載在方冊只在勉不勉如何耳僕
行年六十言動事為無一可向人道者只得如斯而
已何足言千里走書甚庸感戢而所以致此者恐左
右亦誤聽道塗而然奚只以汗顏言

答鄭允範

在禹○壬寅正月二十九日

辱賜問狀遽經三載懶散昏耄尚稽謝復今又非梁
君之起余則殆永置乎忘域矣豈勝愧汗恪詢孟春
省餘震良一視百福佔畢家計日有溫故知新之趣
否懸溯不任憧憧記下敵門兢兢頓頓無陽界意思老
朽人事實無足恠而但將為無聞之鬼者甚可矍然
耳座下何所見聞而曾施過恭之禮耶又聞貴鄉儒

雅彬彬幸望朝夕資益無或安於小成如何不面之地安贅一言其不為僭汰也歟

答金明彥

萬源○庚寅十一月

天外問聞在平日熟面尚不勝慰感况於未然者乎
迺知足下誤聽道路有此過舉雖認風力之出於尋
常萬萬而愧我慳慳殊未克副其好問之善端也第
求志之方近在眼前不屬高遠則須自我一心上抖
擻猛省不容以準擬等待聽人知委而有所前却須
與仁里師友晨夕切磨因其已知已能而勉勉不怠
則自有見功無事邊幅而有以為進德修業之基本

矣眷戀之及不可無一言聊以奉瀕未知如何

答丁燦化

炳和○己亥十一月十五日

我朝有門地陋規雖通天之學絕入之行一號為庶
不得齒數於卿士大夫之列者以改嫁女子孫勿許
清宦之說為之權輿也蓋嫡庶二字名位雖別父子
天倫一也故禮有立庶子庶孫為后之文國典嫡庶
俱無子乃許立后則無嫡子而有庶子者以庶子立
后豈不明甚先賢有行之者栗翁慎齋是也

答梁茂如

松○丙申六月三日

病伏老屋與死為鄰華宗大雅奉傳珍函盈幅媿媿

無非出於肺肝相與拜讀銘感不知所喻第俯教以鄙空踈萬不堪當夫金石重事也一步疎忽後悔莫追豈以執事奉先之篤而率易若是千萬更商務求大筆俾無餘憾如何語出東曲非屬飾讓伏唯照下

答李致綱

文欽○癸卯三月二十八日

有事先塋曾以去年九月離家向北經歲迎春始於昨日歸尋鄉笄則案上留一封書幅披展眼青乃是執事者手蹟牘尾日月殆近半年而苟非厚眷所暨其能無恙於衆撓之中而俾垂死殘喘為替面之地也耶慰滿何可言即者夏節將屆未審尊候對序寧

適大度并若何承有從事誠敬之教老而好學令人欽服不勝執鞭之願而奈老不從心何臨風引領只切窈糾益漸敗日甚規官聽塗俱屬末如重以心神凋喪朝之所為夕已遺忘隅坐童子每失其名鬼門消息殆朝夕事也何足言

答李致綱

癸卯九月十六日

示諭滾滾令人發省蓋其憂世之志求道之勤求之古人亦難多得推茲以往其積累充養馴致不能已之境界將拭目而待之矣心焉敬服曷有其已儒門齟齬是亦近日莫尚之弊風不念目前伏尸百萬流

血千里之禍而妄評先輩長德議論得失何補於事
且其爲說未必有實見得而隨衆雷同推波助瀾適
足自誤而誤人不足驚聽惟就日用動靜上審其善
惡是非而一任吾心之所便穩處則此等舉措雖欲
爲之而自不容於不謹矣鄙見如此未知如何

答李致綱

大學人之視已如見其肺肝即已之肺肝乎人之
肺肝歟

肺肝二字當屬已看蓋言陰為不善而陽欲掩之之
本情露出無餘不可欺人云爾下云十目所視十手

所指者不其較然乎

孟子浩然章論養氣而先言心牛山章論養心而
先言氣何歟

二章大義各有攸主公孫丑問以動心與否則不得
不以知言養氣爲不動心之張本操舍存亡統言其
心之體段有如此者而操存之工不能無資於日夜
所息平朝之氣也

世或以鷄鳴前陳設而鷄鳴後辭神此則間於殷
周之祭禮或神於有無之中與伊川之五更朱子
之質明不同然果無妨乎

祭禮早晚各自不同未敢質言蓋五更也鷄鳴也質明也均是屬於來日而其為思慮定靜未與物接之時則一也要在參酌而行之

答金甫顯章錫

晨夕對越尊閣何書絆身代食朱門高第尚且不免何足為病矧今大亂所迫若爾讀書人其不中途換步手脚忙亂者有幾人是則高明今日之事亦不害為安身寄命底一段權宜之道幸須所居而安不置計較於意內如何如何日新近來安否何如高明之託契親誼麗澤相將殆不偶然幸益懋遠業以卒未

究

答安致恒

升煥○戊戌二月二十七日

來示云云讀來讀去莫省所謂豈口欲言之筆不從意而然者歟人之患在不為既曰竭力從事則何患義理之昧然外驚之文侵而不得要領乎譬之於農耕耘培植用許多勞動歷許多時日然後始論收穫之功無朝下種而夕收效之理惟就古人見成法門依倣模則而孳孳不已則庶見其門路節序森然眼前而有不能自己者矣未知如何荷此詢莛略貢愚見庶或俯恕

答吳景元

永泰○戊戌二月十三日

居憂也東劫也便是一場滄菜地左便稀尺素修慰
容易蹉過曷勝悚慙乃座下曲加恕存垂之德音副
以二篇巨作假借之隆提諭之勤迥出尋常自念賤
劣何以得此於千里之外也心焉感領固知攸謝合
並之願彼此同然而道旣云遠又在慎攝曷其易哉
且夫人之相與貴在知己心若相照千載朝暮苟其
不然同堂而胡越何必乃已况今時象決非出門時
節只得保守此心慎却行止只得與山川草木天地
日月共其依仰而不必濡足於腥羶叢中政是活計

未知如何尊先事實雖云寂寥而邑所錄若是其章
章可據則復有何後人之架疊然後為足憑遵也耶
茲依來狀略加尚論數行未知不大悖義理否耶

答閔士善

膺鑄○丁酉

去秋惠翰十朋之益不足以喻其意一息尚存何敢
忘比來暑雨煩鬱尊體動息曩重掃煩習靜所得計
應益加親切恨不得對榻商確多少也益年進病痼
只得為七旬無聞之一棄物耳第其閱歷之久益覺
人所以異於禽獸者幾希只此幾希底是安身立命
底一線路脉去此一線不能無多少敗闕此政吾黨

之所兢兢處竊附報投之義以備弦韋之資庶不以
汰哉見斥也時事坐在近城莫省何樣而笏 因封
蹉過頓無定期餘外見聞都是不忍掛齒牙間者中
宵繞壁只切痛哭適因轉遞畧此不備

答閔士善

辛丑

別來歲久幾屬忘面令儀令德宛在眼前頽頽非虛
語也茲蒙眷戀垂以金玉感領何可言謹悉靜候動
止神休愷悌大度佳勝五旬無聞之教仰想衰境用
工之靡懈而設有未及之歎比若此漢七旬伎倆則
息黥補劓恢有餘日幸加進修以光吾黨如何益暮
年遷動非擇地風霜餘債原有未盡了勘而然利病
休咎自可任之而已

答梁致三

相辭。丙申六月三日

憂念 宗國募旅赴急略有事在無論其得失進退
之如何只此一舉可質諸神人而無疑考之往蹟而
有徵苟能人人如是家家如是彼倭洋百千輩雖稱
有翻天倒地汨陳五常之許多伎倆焉能聘恠作侑
於白日之下哉所可痛者謂我國臣子而晝宵頷頷
不過聽命於彼醜之願指氣使而 君母可戕也斷
髮優爲也以之劫遷離宮于過半年而絕無虵虺蟻

子出一策杖一戈以救其倒懸之勢者尤不識何說也古之舉義國邊賊邊對峙甬立而防閑切嚴故隨其勢地易以效力今日事異於是倡始發跡不甚齟齬而未稍歸宿頓無好策奈何僕於此舉未嘗讓人而只緣力量短拙氣血凋敗自初至終不敢生意流言廣布至於如是還覺汗顏耳

答文子弘 戰恒 ○辛丑三月五日

賢胤謂我有一日之長而計託以蓬麻之列遠途踏跣相守決判其志甚勤其事不偶苟有可堪能不盡情而顧鹵莽伎倆自救不給何只見其天資精敏本

領已固由是以往勉勵不懈則前頭進就曷可量也尤以見德門培養之力也

答文子弘 壬寅二月十七日

昨年年形意謂大同無甚異等承此少康吉人所居福星照應不可誣也賢胤左顧甚覺眼青而竊念古之君子所以立其身者政以其不取諸人而取諸己不務其外而務其內者實是一副單方而顧乃捐書廢業觸冒艱險僕僕焉奔走道路之中大是失錯望須因其過庭倍加鞭繩而使其向裏孜孜則以若聰穎之資何患乎古人之不可及也荷茲勤念畧伸東

曲

答安舜見 國楨

教多少曲折雖知其自謙德中流出者而此事決非
猝乍間責效者唯不疾不徐積漸優游磨以歲月然
後可收實功幸勿以好徑欲速底意想撓我方寸而
有妨於日用作為之間也至若博學取友亦是不可
已者而空踈如病人者何足為有無也耶須一切刊
汰此等說話毋至重添愧汗千萬千萬僕一味病歿
去死不遠而已惟祝珍重不備

答安舜見

竊觀世人於利害分上箇箇熱甚而獨於自家性命
上一切冷淡殆若風痺委厥不干痛痒此是第一病
處今承來諭不覺悚聳起敬繼之以太息也天地蔑
貞去去益甚到此地頭更無去處庶或有千秋必復
之會耶一息尚存亦不可以恃此而怠於用力也

答金文見 奎源 壬辰五月十三日

有懷不見只切甫田之勞即茲兩少叩荷華問入眼
三復以來我心釋然不啻狂寒而濯清也從審夏令
定省學履一例珍勝遠外翹誦奚加於新結茅茨
將以為招朋麗澤之計者政是好消息也其課程規

例宿德如日新諸斯文在焉想應晨夕慙慙有以爲
異日需世副用之根本田地恨不克一趨文右叅聆
緒論而寬索居之懷也鄙人依舊蹇劣頓無一半分
可向人說者只切歎恨

答金大成

永珍○戊戌二月二十七日

歲改春殷懷人益切茲奉垂存慰浣何量竊惟篤老
情地主饋無人幹蠱之勞水菽之供日不暇給目前
道理又豈有急於此者耶須逐事理會勿庸泛忽幸
甚賢季風雨世界重見顧存如非過人之勇斷不可
能苟移得此心專精於方冊研槩之間則程子所云

尤可愛者詎非十分完全者乎分離之場聊以誦及
庶蒙俯諒

答李國瑞

燕容○辛卯

南北涯角問聞差池自是事勢之宜然愚固不以此
介意而來諭訟愆如是重複還覺悚仄謹悉年來體
上康迪課程鞭策溢於辭表淡庸慰賀父師遺訓之
不能十分傳習奚獨高明均是吾儕之大同通患惟
將此心著在腦裏不以流俗奔競貳我所守則庶不
爲倒東來西大段背馳而事變無限難保其善為始
終是則不能不大家提撕無或有因循放過也未可知

如何

答權君七

歲斗〇巳亥三月

先君貴宗氏遠略悉尊門淵源道義之盛與夫承述志事之美心焉敬服采切景仰即茲料表令季左顧手命出袖滿紙津津固非自得深造中來是何積之厚而發之遠也開豁鄙吝銷除頑鈍受賜多矣感載庸有既乎俯教文字不只人地之不稱其屬辭節次專沒前定觀於寒暄例套尚可覩得特以感教之勤不容會默敢以姓名三字撰列狀末驥步蠅附雖極光榮尊慈之本來厚望曷容如是而已哉甚可悚仄

答權君七 乙巳三月

崦嵫景色月移歲遷家間微細事尚不能照管知委矧外他知舊間平安字乎有來無往良有以也而執事之曲加恕諒待之以陽界人事者尤切感悚也蓋當初不量而入無怪其顛倒狼狽至於俘囚押還之境也然知之罪之亦或有一條公議而不至為大段棄物則乃不幸之幸而何可望也

答梁大集

在成〇癸巳八月

先賢謂孝子居喪不可不自致而比之繼志述事以顯父母則猶屬疏節碩哀侍墳簞相對大發身心讀

書講義用述庭訓是目前急務也未知如何

答梁大集 丙申

東擾棲屑雖屬徃境計其始終殆座下省事後初經歷也震撼飄蕩之中其不喪所守毅然自樹優以見平日定力之有在不亦盛乎時事日變駭機叵測萬有進於此之無上層節則又當如何幸一心兢惕常如臨賊對壘勿使等閑千萬千萬

答文聖中

戴九〇戊戌閏三月六日

即奉手帖慰荷十分細審伊來履用珍勝朝益暮習不撤講究所望於賢友者惟有一事而已更何求哉

朱先生以循序致精為讀書之要以居敬持志為讀書之本者雖使聖賢復生所以教人不過如此只當依倣趨趨實下工夫則一日二日自有得力若徒憑口舌只曰如此是本法如此是病根而已而無常存敬畏密察隱微之工則說來說去都不濟事以左右之明豈有是也但相愛之地不容唯諾而止漫以布及想應照亮尊王考墓文重違勤教今茲構呈幸望指擿疵類更為回示如何

答文致慶

戴九〇戊戌八月二十五日

來則有往豈曰昧然而奉書三年衰如充耳心焉結

輻若有疇負茲蒙不較珍幅落手勤慢相懸奚啻霄壤謹審間來侍養履用一例珍衛奉老幹務開卷未易誠有如來示者而曾見自古樹名立身者何嘗盡自關門塊坐中做來耶惟隨地盡分不失正理者是日用法也幸須自力鄙人惟憂半年未見出場未知何日是免得三災八難時節也貴宗分外見顧其喜可掬坐席未暖旋即告別冲悵不可言

答俞道明

正濬○戊戌三月六日

尊先文會堂事實奉讀再三有以見平日所存大家朴實為鄉邦士林之模範準則者依然是蘓湖間授

受氣像撫世興感曷勝欽仰第其俯教所及手拙識淺不足發揮其萬一者為十分可愧耳僕所患脚祟當茲換節一倍肆劇殆難支吾重以家故連仍方在戒慎中悶憐悶憐士一重見顧存其意可感而旋即做別老懷悽黯

答閔彥卿

大鎬○甲午

尊王考侍郎先生紀實之狀此非當世巨筆不能形容大方家間架之萬一決知其代大匠斲鮮不傷手也第益於先生欽誦有素而地左身病既未遂掃門之願又於文字之役一向固辭則無以寓執鞭之誠

而疑於讓折枝之能故千萬冒昧依樣露拙執事者
庶燭其真不能而非故為飾辭也如不得已而必用
之則其間叙事述德未必無多少礙闕處幸勿以成
文為嫌極加照管可改者改之可存者因之無至大
故疵病便同自我修改而為寡過之地矣未知如何

答李穉春

種德○已亥

雪上分辭實勞我懷即奉寵札敬審新元尊體動靖
休憊萬衛久客之餘團聚叙情和氣可掬攢祝不容
言益依昨泐忍只得安過一日是一日之幸耳令胤
芳年美質殆不多見修整如何不須加策至若家累

云云古之人莫不從這裏鍛鍊得來何嘗有一向關
門讀書士耶時事姑無入耳者四疏批旨尚沒息白
良覺悶然耳

答宋正汝

雷勉○辛丑

昏與病兼日益甚焉遠友問字容易闕覆十居八九
想於座下書亦犯是科豈勝悚仄茲蒙不外被以手
命勤怠之懸不啻較三十里也謹審伊來堂候寢膳
對序康寧侍餘唱喏亦復鄭重墳塋失火聞極貢慮
峽裏用山例多此患僕亦年前當此變境急急走省
則已無及矣時當春季改蒞封土還不如少焉草苗

而即復舊樣故慰安告由果如座下之爲而已餘外亦無可攷遵行者仍以蹉過或者無大悖否今承來示不勝感然動情漫以布及耳

答黃道弘

晉模乙巳九月八日

劫海殘喘杜門待盡茲奉惠訊趣味津津令人神醒恭審伊來履起居對序康衛單節松吉遠外翹誦奚踰枉是損末學之不講事多舛錯竊以謂當茲急難之日名云侍從舊物不容無一番奔問之舉徑情而八狼狽而出自家貌樣可且置之其貽辱於朝廷藉口於公評當復如何只恨一息之尚此遲緩而已

答尹文七

殷普辛丑八月七日

過境邂逅三宿奉教曾所未料意長話短徑易言旋及此同衰暮非復別離時者政是實地語也尋常瞻誦不敢自弛際茲手命落案滿心忤欣不翅執熱者之濯清風矧又願養氣侯與時諧適庇下諸百並得佳勝伏庸慰幸無聞之歎後此同然而暮年警省之力既可見矣且門有賢子見辭踐履迥出等輩朋友之望蓋非常人之比又聞一國大先生與之終始前頭事詎可量耶執事可謂百不憂矣歛任庸有既乎益年與病謀百事廢弛重以從弟一人相依爲命之

地遽爾傾逝久視長存令人可憎耳且况年形大歟
見聞悚凜只麼殘喘將未知稅駕何樣耳

答閔龜瑞 洛鎬○乙未

侍郎公文集竣役至此若非誠孝之篤風力之健何
以能焉如畿輔間疲軟衰淡一類輩人雖十駕而難
追也咬菜窩文字反覆玩繹雖不敢悉其底蘊而制
行之篤造詣之精當不讓於古昔名德則顧此玄晏
之誤及無似欲其措辭又豈非萬不著題者乎多少
衷曲已與伯氏有槩及幸益加潤色無至礙眼千萬

答趙景彥

昌駿○壬寅九月十四日

山門分辭依若夢境浮生聚散本自如是不須爲戚
嗟語也而老懷頽頽曷可名言萬或兩家後承苟全
性命於板蕩之中則未始不看作故事而爲相好之
階梯然亦皆閒漫說話可笑可笑令侄委存珍函入
手謹悉秋暮尊體起居神休愷暢玩繹彌密存養完
厚彼百千紛聒何足以亂我靈臺爲之健誦未已益
依狀潰劣無可仰道惟是故山發程迫在日間寒節
驅馳預切關心教文字不敢避走強顏草呈揣摩杜
撰太涉不誠幸一晒領之

與李叅判

南珪○丙午二月

值此世變願一識荆承聞處義之究竟久矣而瘖病
人事未由遂意是可曰喘息尚存乎謹請春仲台體
起居無損杌憂虞之中遠溯且禱益鉉奄奄然只一
未冷尸無可向人言道者略有同志相顧以奮動決
策然未知來頭作何許樣也愚意則相朮相應惟有
北京而今日申包胥之望皆推座下茲敢仰請未知
台意如何

答鄭致學

問教○壬寅七月二十一日

逆旅周旋雖不從容聽言薰德決知執事之為善類
吉士也迺於知命之境忽作四窮之首天之畜於吾

黨何其夢夢也竊祝淡自寬抑以慰幽明之憾千萬
幸甚俯教若有暇隙謹當留意而鹵莽杜撰有何可
取益三夏驅馳之餘百體牽引不堪支吾方向田里
而回首嶺雲只切悽黯所歆言者何限而行忙不備

答韓文五

擇東○己亥三月八日

理學通錄係是新面亦畿輔之所難家藏今乃容易
得之於立談之間若非執事而世愛人之德何處得
來顧昏翳日甚有難一番卒業者為可悚問耳白雲
洞記眩暈餘症不堪入思為煩賢胤結構觀其體裂
手段黎眉作家斷无遜焉是何鍾氣之卓異也執事

可謂無憂人矣只是行也一段文字之有涉爭端者極涉不緊而亦非外人所勸沮而然奈何

答金敬文

漢穆○巳五月二十一日

益鉉潦倒少壯奄至老大疎懶頑鈍無足備數若其嗜善好義慨然乎緇衣白駒之思則庶謂不後於人而病伏草間自致靡階茲蒙尊慈不以避外辱垂德音是何謙之光而禮之恭也至其見喻於不佞者則類皆過情殊不著題恐未免君子一言之不知也第今天地閉塞人心陷溺大道之喪幾乎純坤願益讀已讀之書益講已講之義不患無位患所以立不患

莫已知或為可知之實克副遠近士友之望千萬千萬濫荷知照漫茲架疊庶不以為僭汰也

答鄭象七

斗教○辛丑八月二十五日

頃者俯存已屬感載重蒙記戀寵以德音老吾老以及人其座下之謂歟恨病廢空踈無以仰副盛意之萬一也秋夜漸長燈火可親未知尊閣在何書道不遠人而人自遠之事非難行而人自難之要在反身內求做親切工程不可作泛然物事而玩愒時日也相信者在猥陳陋見庶蒙釋狂之量耳柳哀蒙衰再涉其孝可想人非木石其於所懇曷不盡情而奈本

領掃如末由如望何僕間值功衰又兼宿病矻矻度
了何足言

答柳華應

永吉○壬寅七月十五日

半餉團圓得未曾有荐承委翰尤感不遑之盛也前
此俯懇文字見無豫字工程逆旅奔忙中僅構草本
託賢李使之量宜去就庶可諒悉手戰掛漏仰惟哀
照

答金玉汝

相珪○辛丑九月十二日

頃蒙不遑賁趾窮樊感頌之餘英音雋標宛在耳目
間雖欲弭忘不可得也即拜罷翰謹審省餘體事神

休愷悌令胤凡節讀其詩聽傳言可作橋頌實賀德
門種善培蘭之慶非小小家計所可比倫由是擴充
火燃泉達則將來進就詎可量耶甚感甚感僕依昔
庸碌無足為朋友道者有何餘波可副好問之萬一
只於眷愛之地長短相資使此老朽免得大何則是
尊慈之賜也

答吳汝周

昌鑄○戊戌十二月二十日

前札未覆荐奉手命悚感交摯不容云言以忠信本
領內奉父兄之訓外資師友之益提撕發省有方進
業已之勢心焉敬服曷勝勞祝至若見諭之勤今日

事便若同舟遇風自家性命救拔不給矧有餘力違恤其他惟求之在我一意務實斯其近之別無方策耳臨便略伸不備

答白子行 景貴

言旋未幾荐惠手墨雖在病伏之中不覺眼青從審侍經體事比來萬旺何等慰瀉行餘之工想當慥慥而用敬致知之諭尤見其自待之深也令人欽誦益宿病支離無陽界意思苦悶奈何人家文字或有不不得已酬應處而健忘日甚一並廢却久矣尊祖事狀既有松沙所撰又何必疊牀耶至若碣銘別求作家

以完爲先大事如何明春左顧豈其易耶見今時象不翅危急士友遊從亦恐不能源源也神昏倩草惟希侍學加重

答魚升汝

聚善○壬寅八月二十八日

頃者電別雖若夢境視以一日之長而在費跋涉其厚可忘茲奉手命謹審省餘學履連樹絆繫人塾行住不任縱不快活當此之際苟全軀命亦是一道夫子所云禔在其中亦未必不是此等之謂也隨其見在無入而不自得豈非進德處耶僕一出門庭便同流連三夏歲月容易消遣於水聲山色之中於暢鬱

舒懷之地未必不謂一段韻致而其在反身收斂之
義不啻南越而北轅有何可益只以歸棲後家內無
顯故為幸耳

答魚升汝

甲辰七月二十八日

李友左顧手命八眼慰倒罔量從審秋令省餘動止
神休愷暢玩索彌密存養愈篤長夜世界一線陽脈
政是欽仰處幸益懋德業以光吾黨千萬損禾糞土
賤名露出朝紙裏許委折究說不得而揆以事體不
可坐而防塞則為走家兒使之數行辭免又不知未
稍之如何出場也年號用否誠如盛疑只可處之以

知禮昭公而至若儒門典式則又當有別樣區處矣
自餘惟祝加愛進學

答朴明仲

永東○辛卯九月二十三日

客春審別尚有餘悵即奉惠音慰瀉可言具審定省
之餘佔畢課程不以世俗所尚亂我方寸而汲有鞭
辟近裏之意由此以往其將沛然而莫之禦矣曷不
甚感至若義理未熟氣慾潛滋又是喫緊體認發病
求藥之切要肯緊而顧無得力可以奉報然先從章
句註解上念誦玩繹然後可得明義之端就動靜語
默上戒懼省察然後可收克己之功捨此二者又無

別般法門不可謂淺近陳腐而忽之貴在接續不間
斷耳俯詢之地不容退托敢誦所聞豈曰實見云哉
幸及茲好光陰矧致下手不至如老拙之垂死無聞
千萬幸甚

答安公三

圭容○辛丑十月四日

猥蒙尊慈眷戀貴趾陋室重垂金玉此意良勤雖
之古人而未易得者感領何可言謹審伊來省餘佔
畢日有事在抖擻照檢想不以幽獨而為差殊者為
之健誦殆不能已也僕三夏傷炎餘憊未祛委頓床
席其狀可憐重以湖西農形全數歉荒大同運數未

由逃遁只當任之天命而已奈何

答柳春伯

寅爽○辛丑

遠蒙記存屬意辛勤副以西山先生實記一寫拜受
至友特地激感非但以言語文字之間而已也書后
日月已富動靜諸百更何似仰溯憧憧益客鄉踽踽
無以定情千萬夢外奄遭抱川從弟喪于殯于墓並
失奔哭痛苦廓然不自勝任甚矣人生七十之亦支
離也重以新寓水土大是不服百病交攻殆難抵敵
良用悶然耳

答梁清一

在德○庚寅二月二十一日

千里德音闡入樵牧之社濯手荏玩辭旨鄭重決不著題於麋鹿魚鳥之羣而乃其屬意之勤則盡以古入之道望於不直一文之身厚貺何敢忘也只恐鹵莽蹇劣重兼衰相已無朝聞將有夕死尋常兢惕實非虛語也惟左右勿以例套相關時惠頂針以率大惠也噫此日此時何等厄運升天入地判在瞬息亦願左右明心立脚不墜聖賢之教父師之業是第一等義諦也未知如何

答南士行

廷瑞○乙巳三月二十二日

前此稽覆悚矣勿言微分去就奚足重輕而致使令

徑跋涉於蹄迹塵埃之衝而致無限勞攘者心其可安益數朔旅瑣多少陳腐有同一盃水救一車薪之火不能息焉謂水之微則可謂火勝水則不可矣而滿廷聒聒都是水不勝火之論也無怪其淪胥以溺而莫可收拾言至於此痛恨何及第吾行故遲畢竟拘之囚之辱莫甚焉則竊愧見事太疎不克早決其去就也

答南汝弼

泰熙○乙巳三月二十二日

頃在故山厚蒙御者輕千里見顧分外欣忭曷容名言適值採薪之苦話不盡情容易賦別尚庸依耿如

物梗喉茲承荐施從悉伊來體上履用一味珍重課
程節度知有事在慰浣良深僕不量而入者無恠其
顛倒萬端而自家得失可且置之其貽辱朝廷喫人
唾笑倘復如何只有苟活之恥而已病席圍圍略伸
覆儀

答李行源

宗泐○乙巳四月四日

遠地問訊一之猶難矧又再焉而及於患難奔波之
中者乎銘感在心不容云言敬審尊候動止一視珍
衛卜地寬閒外塵靡侵我飲我泉我讀我書此日清
福奚踰於是遙切健羨記末一八城門不容以天
意之落莫而悻悻其去就也是致睡肝堵立再被倖
囚押還鄉井似此貌樣何足以對人言也每得朋友
間慰藉說話未始不面發頰也

答文周尚

浩惺○乙巳四月一日

還自日下萬事於悒俯仰穹壤寧欲無聰茲於料外
惠存入眼益感不較之厚意矧又日來侍養學履一
視珍勝者乎記末狗馬微忱只欲為國存與存國亡
與亡而以死繼之之計矣遂遲遲其行竟為衆夫之
的而容易過一場劫運者自愧愚昧之專沒見識尚
謹怨尤想知舊聞之亦當恕其狂而恤其志也荷茲

記戀不可無自白數字替伸仰惟默會

答田斗泳

珪鎮○庚子十一月七日

教意反復以還悚仄多矣蓋以後生之淺劣尚論百世之前固已僭猥儘不堪容易下筆而迫於尊命抗顏塗乙追思多愧至若未隱先生之未及並列其於敬人祖考同已祖考之地何敢率爾且三先生道義風節之同條共貫人孰不知而偶爾精神不貫且緣尊慈之未及提醒而然承此勤教其為主臣當如何哉設令改撰其措辭無別鋪叙只就見成底添未隱先生諱某七字下段則字下又添信乎其三字以去

想應叅商其情緒也蓋依昨潰劣頓無可奉况歲色垂窮惟祝以序加重

答田斗泳

癸卯十一月

病淹杜門緬想德懿即茲料表珍重金玉閉然入手故人之不我遐棄者如是矧屬歲寒侍履起居連享萬重者乎遠外翹誦差可慰豁鄙人近偶得河魚惡症廝殺旬餘終未退聽此而不已死亦容易夜朝常理亦將奈何只當任之士論紛紜以若鹵莽亦參其中乃事勢之不得免者豈容以一時謗言為欣戚於其間也耶

答鄭準明

東基○壬寅七月二十日

日者賦別尚有餘悵新涼入戶侍體一例鄭重記下
今將踰嶺勢當費旬望日子庶可入處而觸熱奔忙
還覺可憐辭曰餽贐舊禮或然而今茲過情在我爲
傷廉在座下爲傷惠得無未安者耶十分汗禰影堂
事事屬草芻凡節之未遑者未始非一鄉前頭之責
而其拔例究終惟座下諸宅尤切注心感愧感愧

答鄭士明

載基○辛丑十一月七日

千里信音帶得方丈山色而入于几席不論箇中命
辭詳略之如何其爲欣滿未可以等閑看過也從師

友讀文字迺是無上珍劑外此而別有可言云爾則
乃所謂騎驢覓驢不亦求之未切而思之淺近者乎
惟將前人成法俛焉孜孜日不憊者是目前急務
耳僕之所聞者如是非曰有得力而然幸須恕量惟
祝因序加重

答鄭士明

壬寅正月十八日

昨冬款扉迄庸慰感言旋未幾繼以華墨左右之眷
念老朽何其篤也敬審新年重省體事茂膺萬祉遠
外奉賀無以過此橫川祠役將至告功是固本孫之
幹旋而固非士林幫助之力也寧不知感僕年迫七

旬病日益痼只自悶憐李友臨行略此奉謝

答南明重

昌熙

敬夫

台熙

丙午九月

鄙人老而不死熱血所激孽由自作顛沛至此何足言乃若迂友涉海尊商致意誠是夢想所不到也驚先於感罔知作如何語奉答其至意萬一也自餘畏約多端於此君未能盡言矧屬紙筆間者乎統希照諒函并一紙奉答手戰未成字可愧耳

答安明元

東炫

乙巳

八月二十九日

誰昔逢迎便同忘域得仲夏廿四日惠訊知間罹大故終祥奄過哀慶問聞自是常事而涯角落落容易

蹉過曷勝悚慙即茲秋深伏惟經體對序珍衛令從攻苦朔餘偶爾與兒子西笑滯而棲屑今茲還來念其路憊不可趁即發程勸使少加調攝隨意進退而本宅倚閭之懷想一日如三秋也僕三夏病軀當此秋節宜其少健而圍圉日甚人鬼未判只自可憐

答申文淑

恭禧

癸卯

病與年深頹闕益甚去鬼門不遠乃左右處之以陽界人事而滿紙蠅頭字有若與強壯者反覆上下然還切愧汗謹審年來侍履萬衛收斂存省日有事在極為慰仰僕從少潦倒實無一副當得力處至若近

日則神魄離散自家一款救拔不得矧有何餘力可及遠友者耶來示狂瀾滔天人欲日熾所當從事已辦讀書外更無餘筭云者是不遠復三字符也只所患者遲疑等待二三間斷政學者之大病幸加努力

答黃景涵澈源○壬寅十二月

雙溪七佛之間數旬接晤可謂不易得之奇緣而歸來馳張政不歇后即奉手存驚喜可量謹審省體寧適諸度必謚存養日熟省察益精有以進於高明廣大之域想有知我者豈惟天乎之味矣健羨健賀益衰徵與病俱催冬之夜過甚支離何足煩說未死前

復或相見否擾甚不備仰惟照會

答李仁甫

長煥○辛丑正月二十七日

朋友往復奚啻盛事而老慣無聞言不盡意草草作平安二字者真可愧之甚也茲蒙不遑垂以德音盈紙委曲若相與上下者然感戢不容言夫士而有志者鮮矣既志矣又得賢師友道義俱全者為之依歸者歷數古今更有其幾高明生詩禮之門薰染有素遊諸長德左右見聞廣博為賢為君子將不待他求而得之於此矣豈不甚感惟以今日之心為心勿為風氣習俗所遷移者是一部準的也未知如何

答鄭子元 尙憲 ○癸巳正月二十九日
僕朴陋無似猥蒙尊從叔丈汲引吹噓置之朋輩俾
不得任其顛沛量度分地已極悚仄重以座下不詳
裏許一體雷同示意鄭重政猶曠野檣櫟有取於良
匠荒田稂莠不棄於農夫也雖感雅量奈朽腐空蕩
萬無一取何禮際往來不可晏然妄雜蚯蚓

答金仁淑

秉厚

敬淑

秉肖

○癸巳八月

先施聖師尚云未能座下能容易不賢而如是乎竊
想其懇惻忠厚底心非只私一愚昧也即公一世共
善底力量也推此以往其進將益無窮不止爲今日

紙上語而止也甚感篤老情地遠遊非宜幸侍養餘
暇抖擻精彩勿墜典訓是區區之望也僕衰病侵尋
苦無好况耳

答金夏卿

亨善

○丙申十月一日

客歲歷存迄茲感刻歸自坎窞竊聞左右將伸大義
厥聲甚壯雖病淹漸頹不克趨助下風自不覺蹶然
奮起有少須臾無死之願矣頃於孟秋之旬承五月
日所出手命羨緘三復備悉多少乃事不從心顛沛
至此雖甚可恨吾之所仗是天經地義民彝之正大
光明可質諸上帝鬼神俟之往古來今而無愧者則

彼小小得喪何足介懷彼只以成敗利鈍論其歸宿者誠淺之為見也自茲以往惟欽跡杜門忍飢看書勿墜先王先師傳授大訓保全得一箇天賦性命故海上單方此則左右之所熟講亦重翁平日為己為人底苦心也未知如何

答金夏卿

戊戌十二月十一日

歲暮天寒翹誦益勤竊唯經履動靜神休愷悌中饋無主萬事違意簡冊中尋數玩繹想不能專門而誠力所到底應接續無間斷實欲願聞向喻云云座下之知我空踈悉矣宜其對症救拔政所厚望而乃反

隨眾吹噓非只為過禮之恭抑亦有害於修辭居業之一道望即改圖續絃之艱當此人心陷溺之會周旋湊合十不入量固有如來示云者而積蔭所孚孔明醜婦了翁淑妻自當有求我之童蒙此亦徐徐乎無欲速急急乎無欲怠如儒門契活者庶幾近之矣東都消息遜志云亾潭門繼述更有其謹自不勝吾益孤之歎耳重菴集刊役有先聲而無實事者誠為可愧要之有多少財力然後始可經紀此豈畿輔事勢容易辦得者乎僕近十朔以惟憂從事衰境廝殺只麼精神飄散殆盡長在圍圍矣今姪課程一味慥

隨否匪分見待殊覺顏頰耳

與郭允壽

漢一〇丙子四月二十四日

虎尾春冰政今日情境彼此聲音未可一日曠闕而南下以后參商涯甬未承動靜居爾數朝晨夕馳慕只切頰頰此中頭緒略就指日運動不遠伊邇所恃者天地神明而已惟望座下率管下多少及期趨程以爲合勢同事之地似甚好矣而遠地形便難可預料者爲可鬱耳

答鄭儒澤

泰琛〇庚子十一月十三日

尊祖考狀草拜領而至若不朽文字決非淺陋所敢承當今未可容易下筆如有閑隙當收拾精神構數行文以備續貂之資矣以此俯諒如何明春之約預切欣慰惟冀侍學加護以副相思

答吳汝仁

然學〇丙午正月十五日

牛耳荆識蠹樓萍逢天定宿緣雖屬久遠其何可忘即奉遠訊得之若驚不容云言就審間來尊候常屬不健刀圭無效溪庸貢慮記未老而不死忍見民國之奄就是境而尚此喘息不知變動天理人事掃地盡矣尚復何言南北落落從以會面已矣無望惟祝倍加珍蓄以副遠忱

答林景三 白圭

僕少從師友略聞天理人事之不可一日不講而中
涉宦途蹉過好歲月迫此來榆悔吝山積而力屈神
疲追補無計每蒙遠友意其有一段可取而或有過
情說話則未嘗不憚然自矢殆欲循墻而走也幸以
實心相與過失相規俾於就木之前免得大何則是
賢者愛人之德也敢不奉而周旋重菴勵志之卓然
樹立乃間世一值尤不當混淪說去辱招徠觀之竊
笑也貴邊諸賢講道明義聲聞藉甚當此大道淪喪
衆邪文惹之日保養得多少俊彥用爲陽復基本者

天意政不偶然幸十分努力以副遠望

答李禹範

永錫○辛丑五月十八日

頃者珍函趨當付覆而遷就至此曷勝悚仄卽茲一
陰已生謹詢是辰尊候動止一例珍重劬經進德不
懈蓋勤有可以發揮道要者否遠切勞仰僕衰境事
爲絕無可向人道者每承遠友處之以惺惺境界而
託以蓬麻之列則殆瞿然却顧不知將何語奉答其
眷意之萬一耳

答洪德韶

祐鏞○丙申六月四日

遠承珍函敬審侍餘玩繹有相憂時傷俗意在言表

見識之正存養之厚仍可窺其一斑顧蒲柳殘質行之不力老而無聞崦嵫景色餘日無多徒負諸士友相愛之眷者爲可恨耳幸高明視以爲我及此閒暇倍加抖擻用作萬夫不動底根本事業千萬切仰

答鄭貫一

道源○庚辰三月十四日

河南電別依如夢中歸卧窮峽無所事在間或一念尋常往來於箕山潁水之上也即者惠存墮案濯手擊玩句句是情素上瀉出慰滿何可量也從審伊來靜裏體事一視珍衛做工連續遠外醒豁繼以欽歎記下奉老推過日者又蒙 恩叙感祝之極未知何

以答 聖眷之萬一耳

答鄭德潤

昌奎○甲辰十月七日

遠地過從不可以等閒情意言者乃我馬先發竟違盍簪心焉如怒難以爲懷且緣暫時朮友之急而弛幾日惜陰之工則於座下身上其得失利病顧何如也揆以微分尤切汗顏耳記末年迫崦嵫道路棲遑豈其所欲只外面體例斷不可息偃在床越視 君命而止也惟以少壯之心率爾登程不意病勢頻復幾入鬼簿者無慮四五次今僅少可而元氣漸脫難以振刷還鄉遲速不可預料惟祝 晉德加重

答鄭寶汝

鍾璣○辛丑十二月二十三日

歲聿其暮杜門塊居只切甫田即於料表珍札落案披展三復屬意繾綣奚啻百朋之錫也備悉侍體鄭重三餘課程雖未知專力何書而歲月若流寸刻可惜幸及時慥慥勿曰世皆如是我何獨苦而或者泛忽也僕衰削轉甚重以歲屬大無凡所見聞無非亂意處惟庇下諸般及故山消息姑免顯然愆尤稍可慰也貴宗相守一朔極慰病懷而只主人空踈無毫末可資者為可歎耳

勉菴先生文集卷之十一

勉菴先生文集卷之十二目錄

書

答李聖執

戰九○四

答尹洲如

兢周○六

答閔雲舉

致殷○二

答安商樂

弼漢

答朴道謙

海量○六

答高清汝

石鎮○十

與金佑卿

義正○七

答申達中

恭鎮

答徐仁行 鳳覽○二

答安汝恩 澤煥○八

答尹亨三 滋鉉○八

答黃國瑞 稽○四

答魯明仲 炳憲○四

答尹而見 相龍○二

答崔禹叙 銓九○二

答文德卿 達煥○七

答崔聖觀 光烈○四

答金意俊 憲洙

答李鳳瑞 秉燮○五

答鄭學元 經源

答尹公三 桓植○三

答梁順集 在海○三

答李用明 起晦

答金贊亨 永煥

答李明元 守根

答高洛瑞 濟龜

答吳禹三 濟英

答黃景根 仁龍

勉菴先生文集

答申敬郁 學淵

答李聖子 環淵

答魯聖若 昌壘

答張致坤 厚藏

勉菴先生文集卷之十二目錄

勉菴先生文集卷之十二

書

答李聖執 藏九〇庚子九月十日

益鉉鄉曲一愚夫耳足跡不出門外未及交當世君子惟野農村氓是為之伍逮今夏因東峽行轉遊嶺外至八月始返湖西寓舍伏聞令駕嘗一臨鄙疇繼又專价致問於蒹里驚感惶仄不知所以為謝既而拜讀惠書辭意鄭重獎許太過尤庸瑟縮不敢承當然奉玩心劃如承清誨自顧鄙庸何以得此當顛倒趨謝而衰骨遠役之餘百病交攻且新寓異鄉不煖

勉菴先生文集

卷十二

書

一

席而旋起亦事勢之末由惟欲亟以一書仰報而亦
苦便濶稽緩至此雖蒙善恕曷勝悚罪伏惟蒞辰令
體定省萬護門下為龍為虎者凡幾人皆講讀勤實
否不任遠溯區區益鉉老耒離鄉誠愧所教而未免
為年老之聽姑且任之耳然首丘之心已覺日深凡
百辛酸又非故鄉比恨不能早聞教於左右以底自
悔奈何奈何明春當尋舊廬計晉面叙未前惟祝萬
安

答李聖執

辛丑七月十二日

益鉉頓首頃付慰疏浮沉是慮今承辱覆感荷良深

別紙縷縷辭旨款曲禮愈恭而意益勤自顧愚陋雖
不敢當猥蒙知照與有榮焉第伏惟日月如流練事
將近孝子靡逮之痛仰想無涯而宿崇之久未勿藥
無乃哀毀逾節致此沉劇也耶區區貢慮不能自己
益鉉曾於四月哭家從之少我四歲者老懷摧裂實
難寬抑至若賤狀病繫窮鄉無復當世之念惟所願
者時和年豐少舒公私之憂而三夏旱乾大無已判
此身溝壑固不足惜其於國步之艱危民情之倒懸
何忝中夜撫膺還羨萋楚之無知也早晚若有故山
之行則謂當歷拜以今所料無致身之道一番識荆

恐難可期引領北望曷勝悵黯惟祝哀體邁復天和

答李聖執 辛丑十一月二十一日

頓首光陰如流練事已過罔極之痛倘復如何屢月阻閱瞻悵方切今承專使垂問滿紙諄復情義俱摯誠不料窮鄉廢蟄荷此繾綣於哀座也謹審至沍生聞諸節幸無損度極可仰慰而哀體之尚困一豎不勝貢慮况逢此大無必多屢空之憂則藥餌扶將又寧有暇耶守分安命足認哀座存養之有素而謙退自牧惟恐一生之虛度君子勤學好問之盛亦可為今世之模楷殊令人歛衽而起敬也但推獎此漢大

不著題可謂好不知惡之甚也竊欲因此恐懼修省不負以德之愛而其枯衰頹不振何哉只自悚仄益鉉敵門呻吟萬念都灰而一息尚存難忘家國之憂公私無補空歎何益一奉芝字開心道素政是所願而恐此生之不得遂也奈何

與李聖執 丙午正月

多少置之當此 宗國顛沛之秋以令兄苦心在宗室至親之地所以晝夜思繹其報復之策者想無所不至未知盛美果何如益病狀去益昏昏只一鬼樣而或有遠近同志之相訪不計成敗將以舉義為計

而竊有一事仰懇者即請接二字也若密機周旋動
得相應則庶可有潛而顧無可勇往直前者公議歸
於令兄倘不再辭否餘在蔡君面議不備

答尹淵如

魏周○庚子九月三日

景仰高風每歎識荆無路迺蒙御者猥先枉屈於陋
巷之中是何等榮耀而適因東行未克掃榻出迎又
未即以一書仰謝到底怠慢悚悚何言伏惟秋色已
深令體守義益茂聖人云歲寒然後知松栢之後凋
又云君子固窮今世惟令公可以當此雖殘劣如益
鉉者蓋嘗欽豔而思齊者久矣益鉉去五月離家自

原州堤川踰竹嶺拜退陶之遺祠尋鷄林之故都仍
登孤雲讀書臺觀先蹟講族誼至八月始還定山寓
舍平生之遊庶可盡矣而惟未觀頭流是為餘債耳
待開春當還故里歷訪為計只祝益講道義以全終
始

答尹淵如

癸卯八月三日

蒼葭白露懷注政勤惠翰適至可謂思則得之奉讀
慰瀉第審靜中慎候逢秋未蘓眷下憂戚經夏貽惱
區區奉慮且况禔無代耕單瓢屢空之地乎惟幸白
眉丈團會於睽違之餘大被長枕其樂可想且於燕

居之中玩索性理書不知老之將至此則可爲今日士大夫模楷欽仰曷有其極益鉉杜門矻矻頓無陽界意思只自悶憐至若生計倒懸命也奈何早晚一枉固不敢望而既有宿約故未嘗不日夕耿耿也

答尹淵如

甲辰正月二十四日

臣民無祿 聖母禮陟時變叵測主辱已極悠悠蒼天此何人斯生無安身死沒其地未泯一息尚難自持至如居近輦轂聲信密通之地以執事平日之忠肝義膽何思何慮而得萬一可救之策也耶蓋霜冰積漸非一朝一夕之故則末梢至此固其宜然而千

年 宗國遽至如許之境者不可不歸責於任事貴人而其以時運二字瞞過一時耳目者殆賤君之甚者也痛矣奈何謹審新年令體起居聯棟萬衛大度佳勝尤叶願言損契今茲奔哭之行擬在心曲而自月前喘喘猝發未克坐停道理掃然夫復何言

答尹淵如

甲辰四月二十日

日遲如年懷仰政勤際承珍緘十舍餘地有同一席矧盈幅津津除是自惻怛忠厚中出來外除辭單積至五六朔欲準請乃已衆流靡靡一柱亭亭真執事之謂也苟非內重而外輕難進而易退者不能甚盛

甚感彼無邊欲海頭出頭沒終至於販君賣國喪心
失性而不知己者誠可哀而不足恤也仰惟日間棣
歡令候更若何益所患喘症意或差減而一日二日
漸益頻復無望藉完只切悶沓耳

答尹淵如

甲辰八月四日

三夏阻閱勢也而瞻詠則未嘗少弛即者金火交遞
夜分漸長轉輾無寐謹其懷哉料外具老人帶書而
至伏悉間者棟歡起居對時鄭重大度依昨伏慰固
量外除擗捭八朔竟蒙 允俞令人爽然靡頑立懦
古聞其語不意於吾身親見世教所關奚只執事一

已之私而已哉損契病喘氣虛過三伏如經險洋晨
夕圍圍救死不暇中糞土賤名形於朝紙重以匪分
俞音及於陋巷在昔昇平則量時度才雖十疏不起
固無大害義者至若今番事則非只時變之迫於呼
吸事面道理似不可愬爾而進退當否無人可議第
待腹疾少間登程計料到泊之日庶有入聞之道矣

答尹淵如

甲辰九月十一日

拜承惠書謹審令體萬旺實愜願言記下病狀乍歇
旋劇氣息漸至難為之境只信造化翁之處分而已
令胤齋啣在令胤則為親屈是正當道理也但以仕

學相資益堅淵冰之意申提于過庭之際如何三疏
承批未蒙恩諒近又有敦諭促召云尤切兢
惶幸與李令時賜良箴俾無顛沛於將死之時實以
德之愛也孫兒三加將以今十九日為之矣同漢令
惠顧則何幸何幸子且所傳云云是或誤聽而誤傳
之也甚可恠可恠

答閔雲舉

致殷○戊戌六月二十一日

春府丈經歲客館所仗大義雖皓天不復出場未易
炳然丹忠可質神明未知事機物情竟如何齋記曾
謂覆瓿足矣承此揭壁掛人眼目慙忤何言只僉賢

作為當茲聖道受擯之日做得千萬人所不能事此
正窮陰中一陽消息從而讀其書求其道行其行朝
夕有常日月不懈死便乃已而不止為觀聽之美而
已則彼西鬼萬萬輩亦將無如之何耳是則不佞區
區之祝也

與閔雲舉

已丑十二月十四日

日者在訊尚庸依頴雪積天寒伏惟旅體震神休
愷悌衙信鄉候源源關聽進思盡忠退幹私務日不
暇給責任非輕勞神憊精庸有既乎為切溯仰益呵
凍龜蟄萬緣都銷若干憂端亦是預定只當任之而

已俯教弁文及醉韻俱屬拙澁專不成說幸一哂領
即為覆醜政以德之賜也未知如何只相愛之地欲
一奉告則有之世路雖云艱險平易只在我心幸座
下勿以謂吾事已了益講其進於此者紹述闡繹張
大家聲尤不亦有光者乎妄恃知照猥進狂易庶不
以為大何也歲色無多惟祝因序加重

答安商樂

湖漢○乙巳十二月二十日

頃者惠存尚庸依類轉移之際歲聿云暮竊惟侍餘
令體更何似朝家養賊三十年未稍収刷馴至此境
悠悠蒼天此何運數僕即宜奔赴而非只疾病之難

強中路押逐在所難免尚今遲疑者尤不免罪上添
罪也餘非遠紙可悉不備

答朴道謙

海量○乙亥七月十二日

前後垂存三復感戰老炎讀侯鄭重尤愜溯忱示諭
為學之意溢於言表反覆以還不勝欽誦凡人疇患
者以習俗之溺心也以警益之難得也今賢則不然
變進取之志而欲做聖賢惡世俗之放縱而不懼繩
檢忍苦耐煩若將樂焉此非心志之高遠師友之警
發何以及此第靡不有初鮮克有終竊願念茲在茲
不倦不懈期至死而後已則其積累發越將不可量

而奚啻名宦達官之可比哉又有一事之駭人耳目而千萬不當者書面之稱先生是何謂也僕之於人雖蒙學先生猶不敢當况其進於此者乎且既無屈首受書之事而泛以二三次相從統稱為先生則烏乎其可也

答朴道謙

乙亥十二月十三日

關北林生及武陵洞鄙宗之訪略聞尊駕到錦江日子遲速向後無階可承豈勝紆糾念中有人過門納手命忙展圭玩不覺紙毛細審返稅珍畜曠省餘晨昏怡愉殆不以三公換仰賀實淡又承歷拜全義山

丈留連數日兼有疑問甚荷風流之篤向善之勤循是而反躬體驗始終不替則尋源向上豈不綽有餘地乎健羨未已心性之詢愚於此等去處專沒商量且離索窮鄉未克浸染而有獲焉則顧何敢強其不識不知以犯自欺欺人之歸哉然竊聞之此理之在陰陽者謂之太極在人者謂之心而虛靈不昧即其體段然也今若論心而專屬之氣則張子所謂自存諸人而言謂之心邵子所謂心為太極者果何言也政宜講究思索處也天所賦為命物所受為性則或者之謂以性字不可屬於人生而靜前後云者恐未

可知也

與朴道謙 丙子十一月

全生便附陳數字而其去已為一朔未知達否自左右去後病益加鬱益甚漫不知為何事是猶飲食人飽則尋常飢然後方知其怒如也陽復寒總學履珍勝同志切磨有幾箇俊茂否少着熟復此晦翁訓人要訣也將此進進積累充貫則其樂在我而凡人世欣戚不足為病矣順天趙友與同數日見其資稟勇斷議論磊魁真忠信可仗人也且其居地與貴邑不甚絕遠幸須相與以善講禮論疑俾之滋益則豈非

幸甚乎臨行暫伸惟冀照亮

答朴道謙 丁丑正月二十八日

拜書后曰為改歲謹詢侍養百福理會存存日覺向新不進則退凡事尚然况氣欲難祛而天理易泯若非大家猛省而痛著工力其不至架漏度日牽補過時者幾希矣鄙雖不能其所望於左右者則政不尋常未知如何星田喪事聞甚驚愕國家無乞言之地士類失依庇之所運數攸關奚只殄瘁之痛而已竊想左右登門屬耳典型斯在痛悼之忱宜倍餘人奔哭一款在所不已則未知以何間經紀耶示父喪中

聖祖母持服如何據禮父死未殯而祖死服斬以周之說則齊衰云云容或可矣而凡服重可以該輕輕不可以包重則恐又未知如何也此雖尋常亦是大節須問于孰禮者取其折衷何可向警而言丹青耶安清石南兩丈連為萬安宋金二友並依前否損友離違經年情緒難裁幸爾兒子兩朝相守稍強旅懷而回戀家中望眼欲穿茲又強其所不肯而驅逐登程還切惻然耳萬一御者同行則可釋慮念而遠外事又何可預度耶三種謹領此中凡節想可一場款說而春間入來之計斷勿生意千萬幸甚

答朴道謙 戊寅七月

積水窮蒨秋氣襲人此時懷想尤增一倍再涉之約雖云耳醒但是地風習既經領略又此生意得無率爾之嫌耶勤學之際寸陰可惜因些少人事涉危遠尋有百其損無一為益何用苦心為哉言出肺肝非由等閑幸三思而處焉損下親候久隔又當秋節百憂叢集難以支堪而此則坎中本色也奈何奈何古珍丈問安及宋金諸友並依前否咸平金友遠見顧存甚為眼青且其言議風采儘非塵日中氣像大賢作入之風亦不可誣也出去之日謂當過存茲付數

免者集

字

與朴道謙 丙戌二月二十三日

益鉉頓首天不相孝子先府君奄違志物之養承訃
驚愕不能自已詎謂客歲手札遽作泉壤永訣也耶
衣履已歲萬事邃古臨紙靡然曷容云喻笄君子之
孝小而近者固所致力遠且大者尤所當念幸寬抑
情志勿以孝傷孝之地是士友區區之望日月易得
歲改春殷伏惟萱闈氣節康寧侍奠讀禮之暇體事
萬支仰庸勞溯公議不泯多士薦章如是懇摯尤以
見先丈平日事行孚木石而感神人矣敬仰何已因

此而擴而充之是哀之一大擔負也詎非途遠而任
重者耶益鉉省側昨夏以來類復無節頓沒陽界氣
像重值大歉遠近呼庚滿目愁慘非只為一家死生
之故而已龍溪亦以艱食之故奉老入七十里白雲
山中苦耕謀食來頭利病未可預料重丈亦且棲遑
未有計策可苟全者觀變玩占時義固然奈何奈何

答高清汝 石鎮○甲申

周歲之中佔畢勤摯梗槩所及有可繹思至若惠好
不倦擬非其倫則決非賤子之所堪勝也一慰一悚
何可盡旣損友奉老粗過其餘冗瑣不足仰溷示喻

勉菴集

卷十二 書

十二

縷縷益仰虛已求人之盛而本領田地自來滾汨荒
蕪救拯不暇何敢有所言說以取猩鷓之譏也只有
不懈益勤向前擔當誓不作第二等人為究竟法而
已如何如何

與高清汝 乙酉

間來課程見在何書商量舊學培壅新見腦次貯積
想益親切而富有為之攢頌何已損末家禍荐酷從
伯三祥未了又當世父喪事痛厥情私已無可言第
老親大耄之年疚懷特甚一倍漸綴憂遑度日賤狀
依舊滾汨無足奉浼耳家兒亦無頃而只是動處多
而靜時少看字事殊不誠實如是而有何功效也耶
重翁賜環實是萬幸亦可見天意昭然處彼時輩之
許多威勢真覺可笑也

答高清汝 辛卯

天不祚宋 女中堯舜奄棄臣民轉眄之頃練期于
迫撫舊傷今於戲可言華宗入門珍幅在袖封發雖
久感戰如新即茲年來兩堂康寧羣賢列侍詩禮湛
樂善門洪福政自天而不由人底一樂也二樂之屬
於自家事者固知益加乾惕靡不用極而俗習日降
人心難保幸須於已知已能處更致十分涵養以達

子未盡條例則今日蹇滯安知非前頭大施之本也
歟漫爲好語苟且唯諾決非友道聊以貢愚想應怒
照也損未喪罰餘生萬緣都消兼且乘榆景色無望
振刷只得如斯而止耳愧汗何言生理邊說物情世
道窮到極處萬無良策惟當付命於天置之忘域而
已第於近日姓名掛人齒牙便同臺章如干師友無
一全完未知末梢之又如何矣

與高清汝甲午

相信者存曷容以面不面爲異同只接於耳目聽於
道途者莫非可駭可惡可恠可愕而竿頭餘喘頓沒

安身立命之地則自不勝南望興喟思欲有資於麗
澤末光而不可得也即茲夏令謹詢堂闈寢膳一例
康寧棟床湛樂詩禮進修有足以俯仰無愧彼區區
外物何能動吾一髮是則愚之所嘗傾注企仰而不
能已也僕望七衰年獲戾神天才哭丘嫂又喪冢婦
壻墓餘愆日事呻吟重以孩孫失乳抱負者當添一
巨役老而不死自是渠罪復誰怨尤家兒爲渠聘翁
不得已之舉端見往湖西之初境計其來往可費一
望日子而見今物情動靖俱艱未知利涉否也從姪
舜命幸得上舍之稱寂寥之餘稍覺耳醒耳

與高清汝 丙申

賦別幾何古所云以吾之思子知子之懸懸者政是實境語也秋氣襲人謹詢是辰尊府寢膳對序康適棣床供歡伊吾課程日有佳趣否時事到極雖無可望居窮尤志不可看作第二義幸破著脊梁拚死晉德忠孝傳家禮法立身超然清脫於頽流昏墊之中則是乃不負五百年培養之澤而可有辭於先王先聖先祖神靈矣高明秉執昔非不足而當此長夜朋友至情不能無一語相勉茲以漫及庶可照亮矣年前東擾係是厄運貴近諸處能無蔓延之害否老記

自再昨年以來不忍聞不忍見之事變不知經幾番節拍而尚此苟活者誠對人汗顏耳

答高清汝 丙申

即奉惠存知間來經歷若是多艱而涯角相透未遂問字心焉悚惕固不以事屬既往而有所異同也向者兒子云行念到高明風力意其有多少事在果致枉費神力與其終始於渠未嘗非開荒發蒙之一大好會而到頭觸處盡歡竭忠亦甚無謂還覺未安耳來諭滾滾反復再三只是一場頌德文也豈以高明之愛我厚我無些少規戒之意反效時人軟熟之風

殊非所望於平日也南爲云云自少小以來不無意思而蹉過機會非只一拜今於首丘之年妄用移動大是不容易事且普天之下等是一體又何小小趨避而可望其苟全耶令季氏觸冒寒感衣薄如此未知何以利涉耳

答高清汝 丁酉

賁然之教非不企感而三餘之足難容放過似亦在商量中也李烈士 天褒士論相繼若此忠義之動得夫人者儘不可誣也聖人所云不患莫已知而爲可知者不其然乎益還自哭班宿感添之呻嚙度日重以畿輔告歟見聞民情殊甚驛騷未知明日事又將如何愚則只以安貞吉三字說與家人無他奇計奈何奈何歲已垂窮只冀加愛晉學

答高清汝 戊戌

省禮光陰迅駛襄奉奄過竊惟靡逮之痛益復如新何以寬抑進省晨昏退奉饋奠想亦難暇而未塋讀喪禮既塋讀祭禮先輩往訓極爲鄭重未知近日事更如何前此小紙示及之闕然未報固知事面之出於甚不得已者非有疑信於其間今承大槩是非得失果瞭然矣自反而縮千萬人可往吾又何憚人心

不如我心者真準備語也然大同秉彙斷無一向迷
復之理切祝務積吾誠期之歸一千萬千萬僕姓名
三字不幸為時人所提起露章丐免尚未出場良覺
悶然

答高清汝 庚子

康津貴宗扶病左顧留連旬餘以正月十三日發行
為付數字寒暄未知其無事歷抵溪庸紆轡茲奉手
命無見領語豈或中途添傷而未及也歟其所懇三
孝四忠政是後人發揮之不可已者而奈筆力短拙
不能副遠訪之意者為十分赧汗耳來示令人悶惻

不啻若身親其境只切永歎念昔重翁自少至老一
是無限苦海世界而講磨杖歛之功未嘗一息間斷
其所成立竟至光吾黨而扶世教如彼其磊確若要
熟也須從這裏過者古人真先獲也無可相慰聊以
奉聞想不以為濶於事情而不親切也僕入此年來
昏蔽殊甚每日晝寢神魂不守是可曰陽界人事也
耶李雅文字未克趁副以致再涉悚仄極矣

答高清汝 庚子

前此寵問非一二計醜然逋答若瞽聾然蓋非只筆
路蹇拙實緣懶怠成習不克振作雖無顯責心豈可

安當此捨擻只麼調遣雖云僥倖事有可堪處有不
可堪處賢者之近年所值無非動心忍性處因地順
變不失其常苟非存養講明有所定力難以打過爲
之健誦僕新竊滋味比之故土豈云十分無遜而大
槩則日下稍遠耳目所擊別無顯然惡逆爲之萬幸
而眷率團會尚未了勘亦是關心處耳

與金佑卿

義正○乙丑二月十日

兩載相守千里伴行雖在匹愚凡常其義固不可忘
况賢者之與鄙蹤臭味志氣略爾符同而無所間焉
者乎前後思想殆未可道也未審其時觸炎跋涉費

得幾箇日入抵而體上動靜無損萱庭氣力一視康
安否杳未得聞只切悵黯發解得失何居此雖小事
有命存焉不足爲吾心之動不動也安友亦一向勤
學其胤成人否爲我致意如何金五衛將病勢近復
快蕪否懸念不已僕奉老依昨無足可言只所業日
就荒廢是可悶也

答金佑卿

丙子六月十一日

向付尺幅於臨陂浦遞或者登照未夢表舊館人伴
惠訊來顧驚慰欣釋不容名喻謹審侍彩鄭重課事
日就尤叶願祝累人去月旬間承親候備保但亢陽

赤地百稼報損望秋姑舍目下水菽萬不成樣云千里人情夜不能寐耳所饋十兩出自情認雖不能辭赧汗極矣

答金佑卿

癸未四月十三日

別紙示諭政晦翁所云好消息也左右之從前潦汨曷嘗蒙然於利義公私之別而然哉特以為親屈也門戶訃耳以若好姿稟精商量擴而充之火燃泉達則何患無聞但愚所存鹵莽無以開達其初程萬一者為可恨蓋近年士論三分五裂莫可歸一而要其大槩則不過理氣兩邊而其中主理之論惟我先師及蘆沙而已為吾儒者不可不先知此意也損未省側痛過而賤狀自多汨沒無足奉瀾家兒為同接所牽出住加平尚未還來耳時事尚何言哉所恃者陽無可盡之天運而已

答金佑卿

甲申三月二十三日

有懷不見只自惻惻天外手訊及於寂寞驚倒不可言就審問者侍奉唱嗜珍重美慎瀆危之餘旋奏勿藥先咤後笑罔以為喻記末病親類復調養之節全不成說情理切急有同涸轍晝宵兢凜而已別紙示喻三復以來乾淨一隅亦復如是瞻仰昊天浩歎奈

何第高明秉執確然特立可作頽波之柱循是涵養
不憚不撓則前頭受用曷可量哉蓋近日事變多端
而究其根因不過失察於形氣性命之分而有此未
流之滋蔓則吾輩目前道理只有守身晦迹四字而
已更無別樣未知如何

答金佑卿

甲申十月二十三日

孟秋之日有一少年剝啄門外迎而叩之則乃舊交
賢胤亦左右切戚其喜可掬矧入此年內兩得幸甬
數千里山河風景森然如挹引於下席間慰荷不可
言伊後月三四易謹詢侍餘學履連庸萬衛諸節更

如何遠溯憧憧損契省側頻復朝夕難支重以國有
大亂存亡在即公私煎悶因知攸措而已洪雅妙年
秀發極不易得此中士友舉皆動色相敬擴而充之
前頭不可量來春會圍之得暨亦何足介懷也耶但
自我酬接之道薄約不成樣極用可愧耳方以奔問
次入城略伸數字

答金佑卿

辛卯四月三十日

屏處窮廬萬緣都灰惟漢挈一抹往來心上時發夢
寐感應斯速手命八眼三復諷誦殆狂寒而濯清也
知旅瑣興居鄭重尤庸慰荷場屋事積累久矣雖不

敢預爲漏說而吾知其屈於前者必伸於今萬無其慮勿忘勿助以待造物者處分如何餘在對展不備

答金佑卿

乙未四月一日

閉戶吟病萬念都銷一封惠墨忽墜床頭乃二千里外經年消息也其喜可量從審侍履萬福寶眷平迪何等慰賀算今西邪東匪左右夾攻國計民憂將不知稅駕何地而一幅仙境得免香灑此豈非天意之攸在也歟竊欲駕長風涉層渤從子于翠山萬壑之中而不可得也損下衰狀轉深忍見今日交象公私無補徒切苟活之耻而高飛遠走亦沒其策奈何奈

何可恨者南北落落又值多亂一番握叙杳無其期言念舊遊只增懷惡

答申建中

恭鎮○癸卯十一月

惠寺之別迄庸茹張金生遠顧寵函忽墜慰瀉可量笏惟天寒客館寢啖如常賢抱侍側讀書不懈眼前樂事孰有過此益以痢呻吟快蕪未易荆憂亦是支離苦海餘生必無展眉之日也執事愛不知惡每加過恭又請一函句要訣此雖謙虛好問之盛而其於此漢之空空何哉可愧可愧希堂二首詩調格甚高無容改評而若煩人眼必加一層訾謗秘之似好耳

答徐仁行

鳳覽○丁酉九月二十一日

蒹葭白露懷誦政勤珍重德音颺風而隆謹審伊時
無擾利涉三夏積雨入秋以來體上動靜連享珍福
惟憂之回咤為笑尤覺爽然掃却百務專意此事必
其有多少長進而反覆來教每謙謙有不自滿之意
豈不亦憊憊於愚陋之昏惰難振而施以警誡之當
藥也耶不然則殆高明老而好學不自覺知之一符
驗也健誦何已夾紙所教真實懇惻令人拭目但赦
罪字題目太重改以訟愆字庶幾無礙也耶益脚崇
肆發痛楚呻吟一日間強半頽卧甚庸悶憐耳日者
貴宗二少年齋其先蹟求以一言見之則智齋老人
已有叙述無用架疊而特其遠來之意不容終孤依
樣杜撰而太涉欠敬逢場致意如何

答徐仁行

已亥七月二十四日

尊先世文字及譜序貴隣近境鉅匠林立固所易圖
而過於三思期欲謀及於萬不近似之人亦獨何意
非只膚淺所汗顏竊恐有識俯觀未嘗不致訝於高
明之踈忽也無辭可諉塗乙仰副須更商量初進退
之亭額及東岡字從當依教勿為急急曹友告歸寒
暄都閣

答安汝恩

澤煥○丁丑三月二十四日

昨歲過蒙不鄙辱存陋巷已極慰感而又於都下反
旆時續以手函隱然有眷眷不遑之意自顧愚昧何
以得此於千里之外也平日所嘗景慕於先牛山先
生高風大節而擬一納交於其脚下子孫底一段素
心始乃叶願而無憾矣何幸如之居爾歲周問聞莫
憑塊守窮廬徒切翹誦魏函八眼三復莊玩殆紙毛
墨渝而無斲也示諭縷縷有以見操存涵養之工愈
益勤摯斷非外人所可著手加策推此以往於以紹
述家聲闡揚先懿綽有餘地而無難矣曷勝健羨只

所語及於愚陋者過失稱停便作別人是豈所望於
以德之愛者也耶堂記莫言工拙不欲寒盟而山家
凡百形役多端便同忘域茲承來誨還切汗駢耳益
鉉八莖侍事尚今小康去月以來重添別崇于今朔
餘萬無回陽之道兢凜私情罔知所喻河南變喪是
何報也賢者不壽運氣所關而吾黨益孤莫可依憑
奈何奈何黃雅遠顧甚庸辛勤而只其先狀之託萬
非穩當耳湯瀾滾汨未暇拖長

答安汝恩

辛卯三月十一日

示兩件文字乃千古正學要訣也彼老師鉅匠終身

誦讀而不知何樣意趣者滔滔也今高明獨得於簡
編寂寥之中而為日用持養之功政晦翁所謂天意
非偶然者也健歎何已第其字句轉移之間恐不無
合下商量處而大義既正則小小出入何足病也但
心上有人道之分性上有本然氣質之辨養之存之
只得以道心本然為主而人心氣質只得聽命而已
又非全然除却而不相關也未知如何

答安汝恩

辛卯七月一日

人心道心之初非有二心盛教已得只形氣性命道
器帥役之分則一毫不可踰越若言其用工節度則

精而察之不使人心有以勝乎道心一而守之不使
天理得以流於人欲而已此乃千聖心學要訣後學
之立脚安身政於是判焉當此大禱滔天之際尤豈
不兢兢而凜然者乎高明之深憂遠慮已具於心性
而箴尤以見所存所養出尋常萬萬也益鉉業日退
而所添者衰相且緣荆憂陡劇皺眉度日良覺悶憐

答安汝恩

辛卯九月三日

貧病困厄四字當此擾攘正吾儕之隨時長物捨是
則又無可堅忍下工處矣座下之疇昔然矣而猶且
云云無或致慮於賤子之喪失舊步而加鞭策者耶

甚感甚感

答安汝恩

癸巳九月十七日

俯訊月日自有次序及其入眼則後先而先後是知動以人者自不無遲速緩急而其所驚倒固不可一毫異同耳丹楓黃花秋色崢嶸伏詢靜養啓處對時增衛繙閱經史考察事理必有獨覺其然而人不及知底好滋味矣詩云泌之洋洋可以樂飢未嘗不爲執事者誦之也蓋鉉年到望七百惡俱備無一可向人道者回懸墮地之初衆孤蓬矣以射天地四方之義致豈其欲如斯而止哉少而不力老大無聞罪不

可逃於天地父母之前矣幸執事視爲前車百般振厲無或如之甚所切仰語失先後尊從叔服制雖屬過境老來傷懷不見可圖貢念何旣吾黨不幸省翁又逝同門宿德一齊凋落後死踴躍只切慨廓耳

答安汝恩

乙未四月二日

自正月長弟讀兩度惠書具審年來所經危迫困苦疾風之草歲寒之松可見座下之卓爾不羣而今而後始知人不可以不學道也欽仰萬萬謹請便后有日體履萬相大度一視亂離後淒涼蕭條之意不見可推仁人之惻怛於愷固應爾然矯首千里誠不知

作如何懷也蓋自廢窮山僅存視息而目見先聖先
王典禮文物一朝而盡用是憂傷寧如長楚之無知
而不可得也匪擾亦何世不有惟在乎制之得其道
耳豈如今毀裂衣冠斷棄鬚髮滅聖人之學而為禽
獸鬼魅之形也哉天理則有往必復如吾老將死者
只當以先王舊民歸見於地下恐不能更覩重明之
世也吾南音此何報也殄瘁之慟不但為同門之
故也晚義公文字因循未果今茲力疾構呈幸與諸
君子相議斤正俾免後悔如何所懷何限而便促紙
盡不能一二唯希默會

答安汝恩 乙未十月三日

壇享一款政所謂有其舉之無其廢之之遺意也聞
來喜忭悅然若親近其地周旋於拜跪奠祝之列也
貴鄉風力之勤好禮之篤何如是其難能也告由文
想已有定本無容更言至若歲享常祝或者改撰不
為無說而大凡後人手法終不若先輩之周詳縝密
不但文辭工拙而已則斷斷愚意移用院享時祝式
似甚穩當未知如何如曰未然則三處所舊用祝辭
一通因便寄送以為憑據依樣之地亦是一道也耶
又有可煩者寫真一事於公於私有何可補彌文外

飾初不正當而顧準備物力千里遠役之地違言敗
事亦非道理故只觀前頭動靜而求嘗問其曲折及
其世變層生自昨年六月以至今八月二十日事其
不忍言不忍見之慘酷喪亂此誠何樣時節何等劫
運奔竄之厄迫在朝夕於斯時也雖父祖祠板尚不
知所以處之况何暇區區切切於死便休了之鼠肝
蟲臂而分其心力也耶為教兒子使以此意報答同
社諸友庶蒙印可所留物力亦且半入乾沒半屬見
失云爾

答安汝恩

丙申七月十六日

大變荐疊人類糜爛天乎仁矣胡為崇降不祥至此
極也是際德音不啻若天外消息分表欣豁曷容形
喻書出逾時秋氣入郊謹詢比辰體履動止一例珍
崑涵養深厚清虛日來所以為息邪反經之一大本
根者想多可述為之健誦不已也益忍恥苟全無足
可言而虛聲四馳致煩朋友之疑信者尤極愧汗蓋
舉義事時則時矣義則義矣而奈其上下之阻隔地
勢之艱危不可與壬丙已例一體論斷則只杜門自
靖外似沒別般道理奈何奈何只若干知友之不勝
憤慨有同暴虎馮河而莫有善出場之期會則抑不

無類然關心寢食未甘耳梁朴二友料外逢著又共
結夏其慰無比而窮厨淡泊殆不成說傷哉二字雖
欲勿言何可得也

答尹亨三

滋鉉○庚寅

遠蒙不鄙辱以先施雖屬寒暄例語尚可感戢况進
於此幾步眷眷乎修己治人世故斯文屈伸升降之
大去處欲其同寅協恭偕之大道者豈可容易見得
於頽彼懷襄之中也哉欣然反覆殆紙爛而字幾漫
矣至若稱引過情有駭瞻聆則殊非區區所敢聞也
第悉高明斷跡荆圍親近有道入德之初便以西氣

織盛吾道剝食為可憂者政所謂先立其大而小者
不能奪也由是以往盡吾當為底工程不以外間毀
譽為欣戚而遷就焉則後來所就詎可量耶愚將拭
目而俟之也益鉉少而不力到老無聞只得與壤蟲
同其泯沒悔恨何及惟冀以序加重

答尹亨三

癸巳八月四日

示意不勝敬服如非瞭然於公私大小之別而不為
事物所搖奪安能如許道得出来只夕死可能而朝
聞未易蓋先有聞之之實然後其生其死俱有可據
名言而不止為一偏說話耳未知如何

答尹亨三 乙未二月三日

時事至此只切痛泣去十月旬間自過去人遞到九月十七日所出手存敬審尊體珍衛十起之慘不知以何辭奉慰也間來經歷雖不能詳細量辭意似不免一體劫運况也永歎曷勝云喻彼稱以掃蕩倭洋保活民國而倡明大義者豈意轉之為黃巾綠林而貽禍讀書種子如此甚耶資斧得失姑舍門內親戚暨各處知舊動止並如何聖人以無可奈何處為說命之一字以牖羣蒙除却日用當行外並可付命於天無他道也未知如何記末喪威餘悸值此大亂義

當溘然而苟全視息可愧職名云云無論其出自何邊倭洋叢裏上下名字非尤極駭恠者耶

答尹亨三 丙申七月六日

天地蔑貞去去益甚弑變也斷髮也宇宙殘生何所依倣梁君左顧三度手命并時入眼分外快爽不覺沉痾之祛體也笄令季之中年叩益賢胤之弱齡蒙衰觸處疚懷何以寬抑聞來驚愕不能自己今日事只就閑僻處相與講磨以之自守以之喻家人以之喻同志朋友使免隨眾陷溺是眼前急務雖程朱復起斷當以此為第一義也但千里江山衣食日用之

資盡洩於尾閭之穴血肉之軀保活無路不過如崖
海舟中之大學耳浩歎奈何損末依舊陸碌無足仰
聞只年輩朋友之與共痛痒者逐歲損一躡涼蹤跡
頓沒興况龍友之無端睽離若甚可訝而此非卒乍
間无妄之為則唯當任其張皇而不為對舉者似是
故舊之義故自有此事以來我則只守不較二字以
冀其萬一消融而亦何可必也

答尹亨三

孔孟下稱子字程子上又加子字云云

孔孟通天下所尊也無容更說程子承千載不傳之
統而不尊不信莫知為功則庸學篇題特加以一子
字以致尊重之義

子曰吾十有五而志于學以生知之聖宜無事於
學而此乃勸勉後學之意云云

惟聖罔念作狂十五志學至七十而從心所欲不踰
矩非只為勸勉後學而諉也乃聖人喫緊得力中說
出來也

孔子四十而不惑孟子四十不動心其義一也以
孔孟之聖宜不待四十而以四十為定限者何也
夫子嘗言四十五十而無聞不足畏也又云年四十

而見惡焉其終也已然則四十是君子道明德立之時而孔孟所自道也

朱子徃復中每稱李延平程子不稱周濂溪云云程子之稱周濂溪不可曰專無觀於不改其樂章集註則可見

顏跖之夭壽命也歛行其道而不得其終者亦命耶

命是屬於氣數者非只死生壽夭之所關亦治亂升降之所由也故曰命則付之於天道則責成於已為人子者在塗聞喪則以聞訃日為當墜之日而

其兄弟之先滿者何以處之

在途聞喪或奉使出疆或遠遊不及亦固有之事也豈可以一人之故而變有限之禮制乎

族戚在遠地死於去月而成服於今月則以聞訃日計月乎成服日計月乎

喪出月晦而成服於次月者大功以下除服月數以死月計不以成服日計有陶菴說

答尹亨三 戊戌二月二十五日

再度珍函想若無聞雖云非薄可曰厚意蓋昨者一年非病非飢精神榮衛長在雲霧中四體收拾亦且

無奈家間祭故徃徃闕祭賓友酬接亦不盡情除是
將死之證夜朝常理吁何可及前此兒還備悉致意
梗槩迨茲板蕩討一僻靜安排井曰措置杞菊與會
心人蓬麻相資以終餘日未嘗非素所願言而自來
風力疲軟安於姑息政如家鴨奮飛不能離地重以
孤丘之年棄墳離親亦難其一刀兩段則只使分外
之卓然謀忠歸諸一場說話者自不勝十分悚怵耳
承有溪上之行座下衰境也未知難易勇恟比往年
能無差殊可言耶愚亦未死之前當一拜此老兼售
華陽餘債而滄桑世事未可預料只庸鬱悒耳

與尹亨三

甲辰九月十七日

蒹葭秋水所懷伊誰疾病攻其內亂離瘼於外千里
相望一握爲笑不其易焉則老懷作惡當復如何謹
詢比來棣床湛樂一味愷悌切憇磨琢晚德日新有
以爲長夜乾坤一把燈燭者其任甚重千萬加重損
契昨今兩年長以疹疾從事展眉無日重以頑命苟
全姓名三字露出朝籍兼有 召旨自惟卑微蹤迹
偃卧辭免誠所不堪才近日下又不容無端彷徨乃
轉尋先廬欲觀時事出場之爲而无妄一疾幾入鬼
關歷四旬餘始得履地豈天欲假年徒增罪科而爲

遲速地耶

答尹亨三 乙巳五月十日

座下與僕雖有十年以差而等是衰境餘生無多雲
樹相望只切悽黯即承惠存謹審間者棟床學履老
而彌篤子舍課程一味向上不憚益勤當茲天地閉
塞彘倫斃喪之日所以為挽回將墜之陽脉而為前
頭開太平之基本者座下一隊雖欲辭之而不可得
也千萬努力益山野愚拙老入 脩門學之不講無
恠其始終顛倒而竟為犬羊輩手中物事者雖則云
然知之罪之吾斯未信徒切兢凜耳

答黃國瑞

稽○庚寅二月四日

昨秋手命得自京遞三復荏誦慰瀉何言苦塊餘生
不克振刷尺紙奉謝遷延到此想左右必致訝也向
後家兒入闈而還謂逢貴閑友人略悉秋後動靜云
稍以為慰居爾歲改春節又殷伏唯侍候唱喏一例
珍衛幹蠱講學外物升沉不足以撓吾靈臺有津津
意味否無任懸注益業不期退齒不期添病不期深
得此三不期自茲以往未知所不期者又有幾層節
拍也可愧可愧俯詢益見好問之盛而恨此慳慳未
得明白仰對猥以杜撰錄在別紙賜覽斤正幸甚

四箴言心言性云云

心性互言恐是隨文安字語勢自然別無他意也蓋四箴旨義不過欲學者存心養性而為克己復禮之地則言心而性在其中言性而心在其中非心自心性自性不相干涉也

鬼神之義云云

中和以人身上性情之德言費隱就道理上隱顯體用而言鬼神一章形容工夫積至不犯人力而言語各有當不可合而一之

孫林父審殖云云

二子當時用事近密之人而蘧伯玉一閒散大夫也親疎之分地勢之懸自不相及與其不能救正而適以取禍無寧奉身引退不與其難然則不對而出亦所以陰折其不臣之心而全吾出處之正也愚見如此未知如何

答黃國瑞 辛卯三月十日

耿耿方切惠墨忽墜可謂思則得之也見今花辰政佳更詢侍餘候事萬護閑中佔畢近在何書慶科稠疊舉子雲集而賢獨坐停不朮聞達其無意當世玩樂臯林之實推可知矣豈非令人可欽者乎記下衰

病二字外別無向人道者只自悶憐而已方啓驪行
未盡所懷惟希侍學保重

答黃國瑞

丙申六月二日

天地不復人類胥溺自甲午以後暨昨年大變尚忍
言哉 列聖朝艱難辛苦諸名碩扶植制作之大業
巍勲一朝掃如百萬生靈頓無安身寄命處此何運
數寧欲溘然而已多少示諭極感情曲之無隱雖甚
昏耄寧不反復奉謝其大略也耶手戰掛漏庶或淡
諒

答黃國瑞

丁酉十月十日

杜門深巷利無利之利味無味之味環視宇內復有
幾人臨風翹誦不能已已教修身理家為究竟法門
者有以見到老存養愈益親切之大略也蓋明德新
民其名雖殊而其理一也齊家治國其地雖異而其
揆一也得其理得其方則一身不為少而天下不為
大一家不為寡而億兆不為衆矣夫其道失其方則
一身奈何不下况家國天下乎是其根本田地在我
一方寸上操舍存亡之如何耳平生未嘗不有志從
事而立脚不牢奄至年迫而無聞焉則思欲以己之
所不能厚望於人者雖甚舛錯相愛之地不容草率

以負見屬之鄭重也漫以奉瀆未知如何益自夏至
今脚崇肆作計以一日頽臥居半重以年形告災多
少性命將未知何以出場可悶可悶

答魯明仲

炳憲○丁酉二月十七日

俯教警誅多矣抑以謂愚或有深得實見而故吝不
出耶實以無麵之飢決非區區湊合所能粧撰為自
欺欺人之地也是致每於朋友往來頓無一副當說
話只平平地依本分做去者政欲其以愚為前車之
覆而加戒慎之意也豈不賢於以不知為知甘趁大
何之為耶以高明之知愚尚此如是則他又何說還

庸呵呵時事漸就乖張決無善出場之望益切添憂
而已

答魯明仲

戊戌七月二十九日

向覆迫於憂故言不盡意迄茲懔然奚容言喻即茲
雨中承拜珍幅欣倒罔量而紙尾日月已經三朔其
間起居佔畢之節度如何依舊是未疔之痒竊不勝
一倍紆紉之至也三夏雨水近古所罕念及年形謂
無幸矣到今豐聲洋溢遠近同熙天心仁愛可謂至
矣而奈人也不良自作凶歉何僕自春以來日與病
人廝殺瘦軟神魄十分減削不敷家業從以見縮不

知來頭之作如何樣子天定命數其可逃乎只得隨處安意不敢怨尤事體當然而素無定力未克容易還覺愧汗耳高友前此曾聞其慈候之有時類復而竊嘗謂此是老人常證不甚慮孰謂天不佑孝子遽罹在疚之厄也耶驚惶不可言

答魯明仲

庚子正月十二日

前此二度珍函已極感領所饋藥料油膩甚矣揆分濫悚大是不稱蓋座下之注意眷念若是其摯而愚所報答無一字相長並與其平安例覆而闕焉未遂是可曰遠地有故人乎只切兢惕歲籥載新伏惟靜

候一例愷悌令胤課程長得幾格想有欲罷不能底意象爲之健誦蓋甘可受和自可受采欲學古人而本之以溫雅忠厚之質者蓋多難見而今既得之則其愛好無斁又當如何幸勿以已往自足而前晉不已則日後所就曷可量哉又况有賢父兄爲之田地淵源也耶所可畏者時變無常畢竟吾輩性命不知作何樣了勘益搬移一款無中生事多少勞攘轉及朋友者誠極不安而發行遲速要待道路平坦耳

答魯明仲

壬寅正月十八日

前覆未徹珍函續墜平安二字姑且置之只是晚暮

之年將小學一部為發蒙之資云者則未始不氣湧如山以為吾黨有人唯一意誦念不厭不倦實見得聖人之真不我欺則其為扶植世教之地豈云淺淺哉千萬勉旃亦在日後會同之席一次輪講攷其能否足為今世界耳醒之事未知如何

答尹而見

相龍○巳丑六月二十七日

洗耳人間萬事不聞晨宵方丹樂意津津天之餉高明可謂厚矣心焉欽慕曷勝云言寄示圖本再三奉玩牟陽全幅森羅眼中信其為碩人邁軸腦坎爽然如眼清涼散數貼恨不克攜手徜徉於水聲山色之

中也記文非忘也只昏怠用事越未副教三淵翁謂今世人事無非虛偽唯春日野田叱牛躬耕者差強人意蓋欲學者務其實也無言齋之如何使君子居之則君子之室也使凡人居之則凡人之室也顯晦久近只在自家勉厲之如何齋亦外也文亦外之外也况如陋拙人與文無足可言者耶文就之前姑以此仰塵幸少寬以俟下回如何僕病暑圍圍胃煩却食悶憐奈何

答尹而見

壬寅正月十八日

客鄉離索云謹其懷穎陽一幅固不以見與未而往

來心上則古人所云神交者蓋亦此等之謂耶即茲
歲新省候萬重點檢已往淬礪方來有日進未已之
意淡叶頽言記未添得一齒遽是稀年反顧平生愆
尤積疊雖欲改圖自新奈崦嵫景迫何幸座下覩此
爲戒勿謂吾事已了親近冊子晨夕從事則真知古
人之不我欺而喚醒此心之路頭程曆斷不外是矣
未知如何相愛之過漫以及之庶可相悉矣

答崔禹叙 鈐九〇庚子十月二十一日

前書既極感矣而今日書乃筮仕後初信息也但觀
時勢此未足爲賢深賀而第有一言大學八條是爲

學之書而未言治平之事中庸九經是爲政之書而
未言下學之要則子夏氏之仕而學學而仕者良有
以也且程氏之門已仕者忘爵祿未仕者忘飢寒在
平時尚然况此時乎勉旃勉旃牢著脚跟勿與彼滔
滔喪廉耻者同歸是老友之至望也

答崔禹叙 丙午九月七日

餞別例也而送至千里殆古事之所罕聞迄茲感幸
荐奉珍函知伊來秋深旅瑣履用萬重尤協願聞老
拙揆以義諦無自致之理僅保至今而水土之不服
病敗之連仍只可付諸造化之如何區處而已手戰

未暇拖長仰冀照諒

答文德卿

達燠○丙申六月

兩度惠函并時入手披展三反慰沃曷量備審伊來定省百福佔畢思辨涵採甘旨心力俱勤理事交熟吾友可謂真得講道之要踐實之方矣蓋學不講道不明則無以知修身事親之節物不備事不周則無以盡利用崇德之方是以伊尹樂堯舜之道而躬親耒耜董生躬孝慈之行而手執漁樵於此闕一其弊必至於殘軀滅性傷廉害義此必然之理也况今豺虎荐食人類靡聘利欲滔天禮教掃地其扶持全安

之難倍蓰古昔者乎是則今日作為雖從事乎耕稼陶漁錢穀甲兵何害焉為己之學也事變無窮又未知何樣大禍伏在冥冥幸益加淬礪勿用悠泛千萬

答文德卿 丁酉七月

所示思無邪毋不敬是動靜體用文修之功本不可以大小論也蓋思無邪是向方寸上做工夫大學之誠正中庸之戒慎是也毋不敬是從言行上做工夫大學之修齊中庸之慎獨是也切乞更為推究以示如何搬移云云平生好與賢士友遊若下南鄉便償此願一也當此幾貞得遠離腥塵甚覺清豁二也然

無致身之策此一魔便勝二願豈可容易道耶殆開
商量也

答文德卿 辛丑三月

俯詢心性顧此老昏何敢置對而蓋此二者相對說
則性是理而心則氣也但舉心一字而言則心有以
氣言者有以理言者須將先師雅言而沉潛反復則
庶可瞭然如指掌矣何庸別說為日下之燭耶

答文德卿 辛丑六月

致意神思出入絕不記向日酬答之如何而槩以為
泛言心字則有以理以氣之別心性對言則性以條

理節自言心以主管統領言謂屬理邊着云爾若夫
心氣性理之云固是大同之論而先師本旨則自有
別焉不可混而一之也未知如何

答文德卿 壬寅二月

孟子之於齊梁其進也非干澤其退也非長往一視
其時君禮貌之勤慢而為遲速展縮其不以不得已
於仲子之言而為徊徨造朝之計者較然矣至若浩
然章主義公孫丑設問以動心與否則須先言黜舍
告子之不動心初不過血氣邊用事而於致知養氣
之工則既乎其未有聞也身能免恐懼惑而無顛

倒猖狂之病也惟其先省知言之明而辨設淫邪道
之病加以養氣之節度而致必有事焉而勿正心勿
怠之工然後理事相得内外交養所謂浩然體段庶
可有一二分彷彿影響決非一朝慨然永歎而躡等
坐致之所能至也未知如何杜撰至此還切兢惕

答文德卿

癸卯九月

細悉來紙能於幹務之暇講磨收斂之勤有可領略
而揣摩者為之欽仰理氣之論切不須規規於言議
之末只從日用動靜上審其誠偽真妄之別而加存
養省察之工朝焉夕焉而有常一日二日而不已則

庶有得力之階者此乃先輩已試底單方算加反覆

答文德卿

甲辰正月

示講義大體甚好蓋理是氣之本體氣乃理之當體
本非相離之物亦不相雜吾人工程只有就其中分
別得公私帥役之分而加省察克治之功而已從古
聖訓千辭萬語亦無非發明此理也惟加精玩寶體
不止為一場話說如何

答崔聖觀

光烈○己亥三月三日

課辨排講聲聞甚大病枕蹶然殆欲褰裳追逐於懿
文之地而不能焉則臨風馳神曷其已哉東州古稱

多士而至其有志本實重內輕外者未之多聞豈曰
皇衷之有異同實導率倡始之無其人耳念昔全閩
實蠶蜒之藪而朱先生崛起於是則文明之盛上秩
鄒魯而甲於天下安知今日之舉不為東州地運破
僻之一大根基也歟是則推己及人之工當倍加惕
厲不可有一息閒歇高明雖欲自遜退托不可辭也
幸須自愛加重

與崔聖觀

己亥五月二十九日

雲樹相望渺不可攀心焉怛怛即日敢忘旱餘甘澍
雖極慰滿百稼平瘳有秋無望謹詢比辰靜體珍衛

大度佳迪棟床湛樂兄曰洙泗洛建弟亦曰洙泗洛
達切惛磨礮趣味津津山外之喙喙爭鳴不入耳坎
則所謂皎皎霧外亭亭物表者實為座下準備語也
恨蹙蹙守堂未得一晉文右厭飲清澆之論也蓋自
春洎夏一味斃斃家兒南行數朔之餘才已還棲而
鼎鼎光陰能復幾時漫費勞攘於歧路之間良覺可
惜耳講會一事能一例接續耶科舉之廢殆多士反
本之幾鼓蕤振作決非夫人可能則座下今日之任
不亦重乎幸千萬加重此去鄙宗奮起關北志尚政
不草草亦望助以警發成人之美千萬千萬

答崔聖觀 甲辰十月二十六日

胤君委顧珍函出袖得之若驚不容名言敬審間來
靜候起居連衛大度依昨慰瀉沒量損末糞土賤品
累辱 君命於蓬蒿陋室已所十分悚慄重以 嬪
宮喪變出於夢外如其初不運動則已既已歸依故
土為不遠之地則斷不可無奔慰之舉故暫進門外
蕭寺信宿尋移清水近地休憊數日昨才還棲言念
行止公私何補四疏 批旨尚無息白恐其結稍只
如年前特進官已例而止耳毅菴書來略有云云零
星士流難乎其一時湊合而意則甚善故為傳寫一

通使之入監亦為商量示之千萬服制一款亦是國
典之所不許而朝廷無一人發言歸正者甚覺心寒
耳

答崔聖觀 丙午九月八日

老涉層溟萬緣俱空唯多少知舊往來心上未能自
弛際承珍函知夏間八閩空費勞攘繼值美慎旋即
平完可謂先咄後笑慰幸何容言老拙事不謀始受
禍宜然而少展心鬱亦云無傷還切可笑病枕略草
用謝眷意惟照下

答金意俊 嘉米○甲辰三月五日

玄宮永閉虞卒奄過未死殘生无功固極時事聞之
慘惻天之降禍非今斯今而到此地頭可謂出場哀
我生靈將何所依仗耶萬望牢著脊梁以舉天下夷
狄而我獨為中國舉天下禽獸而我獨為人類之義
類加警誥勿之少忽如何愚之蹤迹有別凡庶不可
不就近日下為進退計料而老病行色未保未稍之
如何耳

答李鳳瑞

秉燮○辛卯十月

承間來課程在雅言一部喫緊滋味溢於言表噫我
華西先生勸教後學之苦心抑可謂不墜於地也然
其為書也盡自平日辛苦咀嚼自得中出來外似乎
淡內實含蓄得無窮愈看愈好非尋常文字可比幸
讀之又讀思之又思期在得力不止為一場閱歷而
便云了勘未知如何

答李鳳瑞

癸巳正月

理氣元不相離而單指理一邊則曰本然之性兼指
其氣則曰氣質之性非獨性字為然心亦有理氣之
別情亦有理氣之辨只在人分揀得如何耳題額之
說尤極不思之甚也若或素昧此漢筆路之工拙則
尚云可也已往尺紙之蚯蚓亦高明屢曾目擊也豈

故為戲言而增其愧汗者耶甚用可訝

答李鳳瑞 癸巳九月

示歲月易得課程難續有以見鞭策振厲之意迥出尋常苟非喫緊體認何容如許道得出来警發多矣程子所云善惡皆天理一句即接解曰謂之惡者本非惡但過與不及便如此此兩句釋天理有善無惡之義已自十分明白痛快蓋天下之理皆善而已無所謂惡也但氣有不齊而氣以行理故施有當不當之別發有過不及之差當者中者固是善不當者過不及者皆善之變也無名可名故謂之惡耳非如善

之有本末終始有物可指有體可據也故為善者實而有得為惡者虛而無終者以是也情是直遂底意是計較往來底則只可曰誠意而不當曰誠情理勢固然不必穿鑿以犯不韙也如何如何

答李鳳瑞 丁酉三月

頓首光陰不留練袍奄過伏惟孝思哀廓感時傷物何能堪忍於靡逮之地也前函未覆後問續陸感認情曲不容云言謹審間來侍餘制履一例萬衛鑽研尋數知有事在深慰遠祝生丁不辰莫知為計字內通患可且勿言惟自家切近上省察克治不容一刻

間斷以此斷定立為家計則設有萬分地頭走避不
得之剝膚大患庶可坦然無憂而處之有餘矣不須
以外間見聞關我腦次而憧憧為無益之憂也未知
如何至若向愚而吹噓嘉獎擬以非倫尤非所望於
吾友也朋友相知貴在規責何用是虛文為哉時事
日就竿頭好還難期只可曰一日無事是一日之幸
也

答李鳳瑞

戊戌二月

卷中契活當接續無間為之欽仰今日事惟以聖賢
之言不可不信古人之道不可不行毋遷於流俗科

曰為究竟命脉然後庶可見功未知如何益逐年漸
削尤悔復積不知不覺輒到無聞之域每惟父師開
蒙之恩如彼其罔極而回顧平昔依然是小丈夫中
夜點檢不覺汗沾幸高明規以為警言力加進修勿負
帝降之東千萬千萬

答鄭學元

經源○甲辰三月四日

教不有今日致力之極安有異日立身之基十六字
此是座下喫緊得力處所以警發老類者多矣將書
紳不暇至若前日未釋不得於今日今日所得還失
乎他日云云似不免語病幸須點檢優遊涵泳徐徐

乎無欲速汲汲乎無欲怠者政是當下節度未知如何僕病與年加只一食尸何足言

答尹公三

恒植。已亥七月十九日

千里再跋事不容易三宿賦別話短意長老懷悽切久猶采動兒還承問細審伊時返駕平寧餘憊未辭興引泓淨天冠月出履歷殆遍自貴邊言之雖是戶庭比諸圻輔則便是天門閬苑豈村鷄井蛙所能易易而兒輩之追躡僉贖了債壯觀可謂侈濫矣居爾秋屆謹詢靜履起居一例珍恙存省玩索長長地新否懸溯無任向詢節拍講之無素固不敢白地杜撰

勸其左右而大抵吾方寸即天命所在須質之內而無徑情之失揆諸禮而無違越之嫌推而至於通行無礙然後庶免汰哉之謗未知如何早早太甚百稼失養一雨支離快霽無期年事利病雖未可必天之愛人昔非不足又安望長時豐亨也耶俯仰高厚只欲無聽耳

答尹公三

癸卯十一月十一日

鄉井戀懷烏得不已曾謂賢者西行出於故舊情誼不得已之故斷非為應薦覓官計矣而既有賢如孟獻子者為其所主則庶不但乃已而加一命之啣也

果如所料乃賢者棄如脫屣有辭可辭之風是非
所養存於中則安能決去就於倉卒之際如是其容
易耶甚感所欲言者略有之而便遽止此

答尹公三

甲辰五月二十日

別後三朔懷思良苦此時德音豈非渴者之得泉也
耶選旆穩柁雖甚慰幸慎節之尚未快復極可貢慮
須藥餌調護扶得元氣如何益病勢比左右目擊時
非徒無減加以脅痰喘氣伏枕叫苦恐無回蘓之望
自悶奈何故鄉之行緣此不敢生意而洛下交象聞
今晏然云爾則亦可謂姑息之幸也左右以草野願

忠之誠慷慨激昂溢於言表足認前後秉執之固也
至若老朽只俟符到發憂雖切於世何補 國制云
云盛論得之

答梁順集

在海○庚寅二月二十七日

天涯落落只切戀戀執謂珍重訊幅闖入窮巷而拭
懶夫病眼三覆愛玩况對蘭儀謹審春令待餘佔畢
百衛尤叶願言示意有以見反躬勉勵不遑自暇底
萬一由是以往則彼世界中喙喙爭鳴何足以動吾
靈境而為欣戚勸沮也耶只有向前孜孜為吾合做
事而已未知如何鄙人蒲柳殘質衰病相因凡屬工

程抖擻不得少壯蹉過無悔其老而無聞愧汗不可
言承有來音還切難安而一邊顯若何可已也

答梁順集

辛卯六月三十日

示杜門或志有以見高明涉歷世情不遠而復此豈
人人可容易判得者耶甚感甚感吾儒法門政不在
高深杳冥只日用常行事親從兄之間分別其何者
為善何者為惡培壅除治不使間斷是第一準的亦
愚之平生所願學而未能漫以闕聽幸以今日之心
常常照管勿怠益勤則豈無得力之地也春文齋記
與先誌今荷勤教尚未入思而當依樣構副也

答梁順集

丁酉五月十三日

老境賦別懷何可言即奉中路手存慰荷罔量想像
前程三分餘一可料其早晚入抵也未認間者棟床
湛樂休憊餘還理舊業安靜滋味想與道路奔忙時
一倍懸殊延平所謂靜中驗未蕤氣象不其信乎遠
庸貢賀時事 因封又退邪說更熾未知今日貌樣
竟作如何變境中宵無寐只切因極耳聞李友言則
夏間學半之工似免離索之歎尤可慰也病未下堂
餘悸一朔後始為巾櫛繼以賓擾略有之未答書尺
一不修整當茲信遞遽使空還益切悚仄時雨類因

三農可望貴邊則如何云耶晦翁所云但願殘年飽
喫飯者故謂今日吾輩也寧不關心耶

答李用明

起晦○乙巳二月五日

日者珍函奚啻百朋而才一着過輒為豺狼輩所搜
括未克更加反覆而蓋悉昨秋拚別後始終行止日
記歷歷如畫中境執事之綜核事情克勤小物者類
如是矣何感如之書後日富謹詢學履動靜更何似
臨風引領只切勞祝僕犬馬之忱老有餘存實冀其
尺寸之或者可效而誠之不篤只取無限狼狽學之
不講勢實使然尚何怨尤

答金贊亨

永煥○戊戌八月二十四日

蒹葭白露翹誦政勤文君左顧珍札在袖拜審夏秋
以還庭候乍愆旋復侍餘佔畢亦有事在慰荷罔量
益其間經歷言之齒酸來頭利病亦難預度自料平
日悔吝山積而未有補過之工則神理感應自當如
是復誰尤哉華翁文集云云無實事而徒使虛聲遠
馳者極為可愧柳汝聖更尋江北雖云勢也一邊思
之則亦且無妨而好議論人者每以不足之意責言
不已誠不知其何見也虎溪金氏事若有昭明文蹟
則何不趁時表出而今乃云云耶

答李明元 守根 ○戊戌八月二十三日

即於便來獲拜珍函滿紙洋洋委曲纖悉有以見不
我遐棄之大致自顧膚淺其能得此於千里遠朋者
豈但以尋常言狀譜役竣事至此當茲彞倫晦塞之
日其所以辨昭穆叔宗族以爲一家信史者雖若私
事有補於風化者自不淺淺爲之健誦笄才有一事
則便有一邊反對孽芽其間雖是古今通患而不意
相免之內有此葛藤致多少紛紜也天地萬事惟直
一字外無下手處高明之秉執如是磊落何有處之
窒礙而無適莫也耶南坡集此翁捐世幾十年士林

之齋爵久矣若非座下出類之誠松沙篤於先誼之
地斷不能若是容易甚感

答高洛瑞 齋龜 ○戊戌十月七日

示諭縷縷此即孟子所云是非之心誰可間然高明
我所好也清汝我所好也固不敢左右其間而竊念
聖人於朋友之饋非祭肉不拜釋之者云敬人祖考
同於己之祖先則泛然處地尚不可信心放過况於
一門之內又當如何且反覆來紙責人較重責躬甚
恕切非吾輩厚躬薄人之法門幸亟加思量無至一
樣葛藤則非只德門之幸亦老友之幸未知如何詢

蕙之地不容但已略伸衷曲

答吳禹三 濟英○戊戌十一月

陽德方昭天意可見故人問札際茲入手慰滿當如何也謹審間來經履動止連衛靜几晴窓味舉世之所不味或衆人之所不尤寬閑意想有足可述臨風翹誦不容云言時事紛綸言之短氣而究其原因則只緣差却於一心上公私善利之別而壞亂至此耳誠可哀而不足恤也僕依昨滾泪無足塵瀾歲色垂窮唯祝加愛晉德

答黃景根

仁龍○己亥正月十一日

示諭多少所以警省昏怠者深矣蓋辭免一爭自知不肖不敢復為開口者誠所前定適者職名虛糜末由展縮且念吾君孤立耳目之閉塞久矣犬馬之忱政欲其芻蕘之一煩 聖聰何暇論格例之不副區區意想只此而已曷嘗昧然於僉君子愛人以德期欲納之無過之地而故犯不韙哉如曰大義所在雖糜職名斷當默無干涉視若秦瘠則已如曰不可無一言言亦不可不欲其上達則別無方便道理二者之間何所取正望更垂教理到之言不敢不服也

答申敬郁 學漁○己亥正月十一日

雅意所存頃已覩得梗槩而承書益得所未聞以若
所造強艾之境志氣不衰只此一著可以矯昏警惰
如僕陋拙初亦未嘗非與凡人同者而中汨塵曰蒙
然以因循苟且四字枉了平生家計狼狽從可知矣
亦以的然虛聲重墮欺世之科內省忸怩誠莫知所
以自拔來幅鄭重引論過當擬倫非古殊不稱停自
此往復須諒加鑄削無重我愧怍也發蒙取資何傷
於義古者學必有官官必有祿食此等一例未可以
差殊者且朱門人如勉齋先生何等工程而亦免不
得終至顯達唯在隨處盡職之如何耳俯詢數條素

昧經義不可強其未瑩而率爾云云以犯不韙之罪
也姑俟後遞恕諒如何

答李聖于

環洲○乙巳四月四日

虎窟餘喘杜戶待盡料表賢胤叩門珍緘入手披展
三復慰當對討就審伊來靜體百福幸何可言記未
犬馬之忱不能自己跨年 闕外庶冀其上天悔禍
而故遲其行竟致狼狽者令人可羞重以為余之故
致朋友之多少勞攘則尤為慙然耳

答魯聖若

昌壘○壬寅正月十八日

樂英邂逅屬在人海漫不記誰某者大半便又置之

卷之十二
總域久矣茲蒙記戀垂以德音百朋拱玉未足以喻
其珍也矧又新正侍養珍重者乎工程貴在專與勤
作輟二字竊非所願聞也記末病與年深寔一言尸
何足道哉荷茲勤意不容舍黥力疾蚯蚓

答張致坤

厚載○申辰正月十四日

聖慈賓天周餘黎民何所仰哺只切罔極前書未覆
後訊續墜謹悉侍餘學履迓新增吉慰百常情而只
門外驛騷安帖無期則大同戎嚴身得不然僕自月
前喘氣忽蕤尚未退聽要之符到消息謂之奈何
勉菴先生文集卷之十二

